

起信別論

上

C40
4514
(112)



C40-4514

了翁上座請大藏及有  
家書置之武州紫雲山  
我微矣培莫庭海中永  
為學者不敢許出院內  
當山二世鐵牛機謹誌



B 64853

大乘起信論裂網疏卷第一

靈峰蕩益沙門智旭述

佛祖之道以心傳心。菩薩造論通經亦唯此一大  
事故。云十方諦求更無餘乘。縱令曲為羣機。循循  
善誘。從實施權。說種種道。譬如三草二木。受潤不  
同。而能潤之雨。原只一味。故云。如食石蜜。中邊皆  
甜。又云。粗言及細語。皆歸第一義。豈應封文失旨。  
橫執名相。剖判虛空也哉。且如彌勒世尊。迹居補  
處。本必難思。無著天親。既是龍華輔弼。則與文殊

普賢何異。至於馬鳴龍樹。並屬金口授記傳佛心宗。其所著述。決定不當互相乖異。乃後世講師。輒妄判曰。天親識論。是立相始教。龍樹中論。是破相始教。馬鳴起信。是終教兼頓。並未是圓。嗚呼。其亦不思甚矣。夫天親宗瑜伽而立唯識。先以唯識破我法二執。次明識亦如幻非真實。有故亦名爲破色心論。今乃目之爲立相教。可乎。龍樹依甚深般若。徧蕩四性情執。以顯法性。故曰。欲具足一切佛法者。當學般若。又曰。若以無此空。一切無所作。以

有空義故。一切皆得成。今乃目之爲破相教。可乎。馬鳴以一心真如門。顯甚深般若。隨智說。以一心生滅門。顯瑜伽八識隨情說。真如卽一真法界。統事理而泯絕事理者也。生滅卽全理所成之事。全事無性之理也。二門不離一心。則無一生滅而非全體真如。無一真如而不全具生滅。卽事事無礙法界也。今乃謂其不同。唯識中論。仍非圓極一乘。可乎。况經論中。並謂真如與一切法如水與波。不一不異。誠證具在。何容偏執。蓋若言定一。則真如

不生滅應一切法亦不生滅或一切法生滅應眞如亦生滅固爲不可若言定異則眞如非卽一切法之實性應在一切法外別有方隅不常不徧尤爲不可故起信謂眞如受熏者譬如觸波之時卽觸於水所以破定異之執初未嘗言眞如隨熏轉變也唯識謂眞如不受熏者譬如波動之時濕性不動所以破定一之執初未嘗言有凝然眞如也

唯識論云不同餘宗離色心等有實常法名曰眞如又云眞如卽是唯識實性明文彰灼若此後人乃以凝然眞如誣謗唯識罪何如哉然則唯識所謂眞如故相無別

卽起信一心眞如門也唯識所謂俗故相有別卽起信一心生滅門也楞伽經云諸識有三種相謂轉相業相眞相宗鏡釋云起心名轉八俱起故皆有生滅故名轉相動則是業八識皆動盡名業相八之眞性盡名眞相由此觀之起信唯識皆宗楞伽明矣宗本既同則諸名義自不相違乃註疏家不能以義定名漫爾依名定義致令二論乖同水火可不哀哉此大乘起信論藏有二本一是梁眞諦譯一是唐實叉難陀譯二譯對閱唐本更爲文

顯義順但舊既流通梁本私心弗敢自專敬以闡  
決於佛拈得宜解唐本遂殫一隙微明剖盡兩宗  
迷執名之爲裂網疏云癸巳十月十有八日下筆  
故敘

○釋此爲二。初釋題二釋文。今初

大乘起信論

馬鳴菩薩造  
唐三藏法師實又難陀譯

題目五字四別。一通略而言之。三。聖能所。大乘起  
信猶云起大乘信卽是別題。論之一字卽是通題  
言三重者。一。論爲能起大乘信爲所起。二。信爲能

信大乘爲所信。三。大爲能揀乘爲所揀也。釋此爲

三。初釋大乘。二釋起信。三釋論字。初釋大乘爲

二。初分釋次合釋。分釋復二。初釋大。次釋乘。初

釋大者。絕待無外。強名曰大。卽是直指衆生現前

介爾心性法爾具足。體大相大用大。三種義故。謂

只此現前介爾之心。隨緣不變全體真如。名爲體

大。只此全妄卽真體中。本具恒沙稱性功德。在凡

不減。在聖不增。名爲相大。只此心性體相不變隨

緣。出生十界染淨因果。達此緣生無性。便能翻染

成淨名爲用大。言體則體外別無。相用如濕外別無水波。故體絕待。言相則相外別無體用。如水外別無濕波。故相絕待。言用則用外別無體相。如波外別無濕水。故用絕待。如此三大不一不異。不可思議。唯是一心。故言大也。次釋乘者。約喻爲各運載爲義。卽是直指衆生現前介爾心性。法爾運載。至於佛地。自利利他。無休息故。名爲乘也。心性體大。卽是理乘。亘古亘今。恒不變故。心性相大。卽是隨乘。不離不脫。恒相應故。心性用大。卽是得乘。

如輪王七寶自在成就故。性具三大。總名理乘。無一體故。照性成修。修時三大。總名隨乘。順法性故。從因尅果。果時三大。總名得乘。極自在故。性修不二。因果不二。故目此現前介爾心性以爲乘也。初分釋竟。次合釋者。雖復衆生現前介爾心性。卽是不可思議大。乘而迷悟。因緣染淨。熏習遂有十法界異。謂若迷此一心而起。見思十惡。則運載衆生入三惡道。名爲跛驢壞車。若知畏三塗。苦修行十善。及諸色無色定。則運載衆生到三善道。更能

畏三界苦修行出世戒定慧學永脫苦輪。則運載  
衆生入涅槃城。名爲羊車。若知十二因緣本自無  
性。體其本空。永息惑業苦輪。則亦運載衆生入涅  
槃城。雖乏大悲。猶作衆生增上福田。名爲鹿車。若  
念自他同在苦輪。志願兼濟。具足大悲。發起弘誓。  
普能運載衆生。漸趣無上大涅槃城。名爲牛車。若  
了達此現前介爾心性。卽是不可思議大乘。深觀  
動心卽不生滅。卽得入於真如之門。始從名字運  
至觀行。乃至究竟。自運功畢。運他不休。名爲大白

牛車。今言大乘。正指大白牛車。揀非門外三車故  
也。復次一切衆生。雖復迷此心性。舉體爲壞驢車  
及三車等。然此心性。隨緣不變。未嘗不卽究竟大  
乘。譬如真金。雖復用作種種穢器。及諸雜器。而金  
性不改。貴重如故。苟知穢器體卽真金。卽於穢器  
得真金用。是故光照阿鼻。不難十地頓超。放下屠  
刀。便是千佛一數。鸚鵡念佛。而焚得舍利。白鴿聞  
經。而轉身作祖。故直指此一切衆生。迷妄心性。爲  
大乘也。前以大揀小。約對待說。亦卽生滅門義。後

起信論疏  
卽小成太約絕待說亦卽真如門義一切衆生現前介爾之心法爾具此二門不相離故故名爲大乘也。初釋大乘竟。二釋起信亦二。初分釋。次合釋。分釋復二。初釋起。次釋信。初釋起者。問一切諸法無生無起。云何乃言起耶。答。法性無起亦無不起。若但言起。卽失真如門義。若但言不起。卽失生滅門義。若言亦起亦不起。卽互相違。若言非起非不起。卽成戲論。當知四句皆不可說。若不墮情執。順四悉檀。則有因緣故。亦可得說。今言起者。乃

非起非不起而論起耳。何者。一心絕待本無能信所信之殊。而迷此一心。則起無量疑惑。如水成冰。翻此迷惑。遂起圓常正信。如水還成水。迷悟雖分。一性不動。故非起。性無增減。迷悟宛然。故非不起。是則起卽不起。不起而起。約此論起妙在其中。蓋雖熾然起信。仍唯一心。仍無能信所信之異。無能無所。而能而所能。所皆卽一心法界。如燈有照。還照於燈。故云。自心起信。還信自心。是爲無上性起法門。次釋信者。據唯識論。於諸善心中。最爲

上首謂於實德能淡忍樂欲心淨爲性。對治不信樂善爲業。釋云。然信差別略有三種。一信實有。謂於諸法實事理中。深信忍故。二信有德。謂於三寶真淨德中。深信樂故。三信有能。謂於一切世出世善。深信有力。能得樂果。能成聖道。起希望故。由斯對治不信。彼心愛樂。證修世出世善。文今論中云。信有四種。一信根本。謂樂念真如法故。二信佛具無邊德。謂常樂禮敬供養聞法修行。迴向一切智故。三信法有大利益。謂常樂修行諸波羅密故。四

信正行僧。謂常供養諸菩薩衆。正修自利利他行故。文應知識論。一信實有。卽同今論。一信根本。識論。二信有德。三信有能。卽合今論第二三四信也。又識論云。此信心所。自性澄清。亦能淨餘心。心所等。如水清珠。能清濁水。又諸染法。各有別相。唯有不信。自相渾濁。復能渾濁餘心。心所。如極穢物。自穢他信。正翻彼故。淨爲相。文良以如來藏性。不變隨緣。舉體而爲一切心王。心所。而此一切心王。心所。隨緣不變。一一無非全體。如來藏性。故此信

越信義綱 一  
之一字雖約俗諦分別。不過止是諸善心所之一。而實卽是藏性全體。非是藏性少分。又雖一切諸染心所皆亦並是藏性全體。由逆性故。多諸過咎。譬如金作穢器。不堪把玩。唯此信心能順性。故多諸功德。譬如金作轉輪王。寇愈顯尊貴。所以一有信心。則一切善法。無不共相應也。初分釋竟。次合釋者。夫性起法門。雖復不可思議。而生滅因緣。則非一概。或信邪倒見起。惑造業。則於正法名爲不信。或於世間因果起信。則成人天十善。色無色

定名有漏善。或於四諦十二因緣起信。則成二乘出世法門。名無漏善。或於六度四攝大菩提果。無上涅槃起信。則成菩薩自利他法門。名中道善。或於現前介爾心性。不可思議。絕待大乘起信。則成無上圓頓法門。名一乘善。今正起此一乘不思議信。故云起信。紹佛種也。復次教中。每云信解行證。今但言起信。不言起解行證者。信爲法界。一切法趣信。離信無別解。行證故。謂一切衆生。雖復不信。自心大乘妙理。起惑造業。而信心之性。未曾稍

越信義編  
論  
減如水成水濕性不改。是謂理卽起信。若聞此論能知現前介爾心性卽是大乘。是謂起名字信。若能念念觀此心性。知其念卽無念不起。無明諸顛倒惑。是謂起觀行信。若任運消除粗染淨於六根。是謂起相似信。若入正位從淨心地乃至菩薩究竟地。是謂起分證信。若超過菩薩地微細分別究竟永盡。心根本性常在現前。是謂起究竟信。是故但云起信也。二釋起信竟。三釋論者問辯徵析。剖斷開示。令得決定之謂。若藉語言文字顯示實

義。對治邪執。分別修行正道之相勸令修習。是教決定。能起聞思修等觀行相似之信。若觀察推求色等五蘊。及一切法皆不成就。知妄動心卽不生滅。是行決定。能起淨心地等分證之信。若得入於真如之門。永斷相應不相應染。以一念相應慧頓拔無明根。是理決定。能起一切種智究竟之信。故名大乘起信論也。此論是佛滅後六百年中。西天第十二祖馬鳴大師菩薩所造。乃性相之總持。言略義廣。誠了義大乘佛祖心印也。若作五重玄義

說者。法喻為名。一心真如為體。觀察一切妄念無相為宗。除疑去執。發起大乘淨信為用。大乘方等為教相也。初釋題竟

○釋文為三。初歸敬述意。二正說五分。三結施廻向

①初中二。初偈頌。二長文。②初又二。初歸憑三寶。二述造論意。③今初

歸命盡十方。普作大饒益。智無限自在。救護世間尊。及彼體相海。無我句義法。無邊德藏。僧勤求正覺者。

造論弘法。必先歸憑三寶者。略有四義。一順古先聖賢儀式故。二令衆生增長福德善根故。三不同外道議論無宗本故。四顯示能歸所歸性空寂感應道支難思議故。文中歸命二字。即攝能歸之三業。盡十方以下。即示所歸之三寶也。歸命猶言身命歸依。歸者投向義。返還義。生死海中。唯三寶功德可作恃怙。故應投向。三寶體性。即衆生現前介爾心性。由無始來。背覺合塵。甘自逃背。今背塵合覺。復本心源。故名返還也。命者依於色心。連持不

起信論綱 一  
斷之所假立。卽是本識種上功能名爲不相應行。非有實法。但爲一切衆生迷情之所寶重。故隨順世間語言舉此總攝三業也。將此最重之命。投向任持三寶則爲增上勝緣。研此假立之命。返還一體三寶。則顯大乘正體。故首稱歸命也。蓋十方者。總顯無窮無盡三寶境也。以衆生現前介爾心性。本自豎無初後。橫絕邊涯。十方虛空。並不出於介爾心之分際。究竟證此心性者。名之爲佛。祇此心性。卽名爲法。詮此心性者。亦名爲法。信解修證此

心性者。名之爲僧。所以三寶同於心性。盡十方也。又復現前介爾之心。體大卽法寶。相大卽佛寶。用大卽僧寶。又介爾心圓具三大理性。總名法寶。覺此三大之智。名佛寶。理智不二。名僧寶。是爲一體三寶。證此一體三寶。名十方佛。說此一體三寶。能詮所詮。皆名爲十方方法。修此一體三寶。名十方僧。是爲大乘任持三寶。若無一體三寶。則無以建立任持三寶。若非任持三寶。則無以顯發一體三寶。如無一心。真如。則無以爲生滅所依。如無生滅門。

中熏習淨法。則無以顯一心真如。當知一體三寶。卽真如門大乘體也。任持三寶卽生滅門大乘體。相用也。二門不相離。故不得偏論歸也。普作大饒益三句。是別示佛寶。及彼體相海二句。是別示法寶。無邊德藏僧二句。是別示僧寶。皆約任持三寶示者。一體之外。無任持故。不歸任持三寶。卽非歸一體。故普作大饒益者。徹證平等體性能以同體法力熏衆生也。智無限自在者。圓滿四智菩提。照理量境悉無餘也。救護世間尊者。究竟大慈大悲。

救惡護善無與等也。法身冥益十界衆生。報身顯益地上菩薩。化身顯益三乘六凡。故云普作大饒益。而三身益物。並依平等法性之力。束之以爲法身佛寶。圓鏡智品能顯法身。平等智品能示報身。成事智品能現化身。觀察智品應機說法。故云智無限自在。而四智心品。並是曠劫真修之所尅證。束之以爲自受用身佛寶。法身平等救護一切世間。報身救護菩薩世間。化身救護三乘六凡世間。故云救護世間尊。而慈悲與拔。並是果上任運不

思議用束之以爲勝劣隨類三種化身佛寶。此三佛寶卽是一切衆生現前介爾心性本具之體。相用。但迷情日用不知。名理卽佛。諸佛圓滿證得名。究竟衆生。衆生無上者佛是。故名爲世尊也。及彼體相海者。彼卽指上佛寶。體相謂真如之體性德之相。旣言體相卽攝於用。以是三法不相離故。此體相用。深廣莫測。名之爲海。雖體相海卽是衆生現前心性。不單屬佛。而唯佛究竟證得。故舉此以顯所詮法寶也。及者。顯佛法本不二義。蓋佛是假

名。法是實法。攬法成人。因人辦法。是故佛性法性。唯是一性。所謂智外無如。如外無智。雖辨住持三寶。亦非條然各別。不同愚法聲聞。偏指黃卷赤牘。以爲法寶。然黃卷赤牘亦是如來藏舉體所成。亦卽體相海矣。無我句。義法者。指能詮法寶也。無我卽二無我句。謂名句文身。舉句卽兼得名。名句所依。卽是文身故也。義謂句之所示。卽指二無我觀法。謂義之所顯。卽指一心真如。佛所說法。句義乃多。今獨舉無我句。義者。唯有此二空。觀能從心生。

題傳發綱一  
滅門。卽入真如門故。無我句。卽教經。義卽行經。法  
卽理經。三經不卽不離。以爲能詮。並不出體。相海  
還卽詮顯體。相海也。無邊德。藏僧者。稱性起修。性  
海無邊故。所修功德。亦復無邊。一一功德。並能含  
攝無邊功德。故名爲藏具。如後文所明。隨順法性  
修行施等。一一皆成波羅密也。言勤求正覺者。顯  
菩薩僧所修功德。不向三。有不向二。乘唯正趣。向  
無上菩提故也。問。何以不歸二乘。僧耶。答。此有二  
義。一約對待義。二乘是所悲濟境故。二約開顯義。

二乘所行亦是菩薩道故

丙 二述造論意

爲欲令衆生除疑去邪執。起信紹佛種故。我造此論。  
於一心真如生滅實理事中。猶豫不了。名之爲疑。  
於無我如來之藏。妄計入我法。我名爲邪執。疑除  
執去。則正信自起。起大乘信。則決定成佛。自度度  
他。燈燈無盡。故爲紹佛種也。初偈頌竟。

乙 二長文亦二。初重述意。二正立科。丙 今初

論曰。爲欲發起大乘淨信。斷諸衆生疑暗邪執。令佛

種性相續不斷。故造此論。

問。偈中先言除疑去執。後言起信。今文先言發起淨信。後言斷諸疑執。何耶。荅。若約自行。則除疑去執起信。如秤兩頭。低昂時等。無有先後。若約化他。則自先發起大乘淨信。乃能斷諸衆生疑暗邪執。令佛種性相續不斷也。故雖重述無重繁過。

④二正立科

有法能生大乘信根。是故應說。

有法。卽指下文所詮一切衆生心也。說此心真如。

相。卽示大乘體。說此心生滅因緣。相能顯示大乘體。相用。令諸衆生生聞思修三慧。乃至究竟成佛。名爲大乘信根。有此勝益。故應說也。

說有五分。一作因。二立義。三解釋。四修信。五利益。

作因。梁云。因緣。所謂四悉檀。因緣。諸佛菩薩。若無四悉。因緣。不說法也。立義。謂依境顯諦。豈大乘之正法。解釋。謂種種開示。闡所立之實義。修信。梁云。修行信心。謂策進初機。令其依解起行。利益。梁云。勸修利益。謂結明此論功能。令人希慕信向也。此

起信論疏  
中一作因者是總明四悉因緣。二立義者爲上根人舉便知有。是約第一義說。三解釋者爲中根人微細剖析。令其永斷疑執。隨文入證。是約對治義說。四修信者爲下根人策進修習。令其依解起行。是約爲人義說。五利益者爲未種善根人。稱歎功德。止息誹謗。令其歡喜向慕。是約世界義說。又就一人次第獲益言之。二立義者。令知摩訶衍義。即是一切衆生之心。不俟他求。得歡喜益。三解釋者。令於一心二門解如實義。得生善益。四修信者。令

其妙解不同。說食數寶。得滅惡益。五利益者。令知同於諸佛菩薩所修所證。得入理益。此皆一往分別。實則分分皆具四悉檀也。又作因。是序分。立義等二。是正宗分。利益是流通分。初歸敬述意竟。  
①二正說五分。卽分爲五。一作因。至五利益。  
②一作因。二初正明八因。二釋疑明意。③今初中作因有八。一總相爲令衆生離苦得樂。不爲貪求利養等故。

總相者不唯此論總相。乃諸佛菩薩說法之總相。

也。爲令衆生離分段變易因果之苦。得菩提涅槃。究竟之樂。是益他義。不爲貪求利養名譽。及恭敬等。是離過義。自離諸過。能益衆生。方可造論弘法。否則名爲裨販如來矣。

二爲顯如來根本實義。令諸衆生生正解。故

通則一部論文。皆顯實義。而生正解。別則偏指立義。解釋二分言之。

三爲令善根成熟。衆生不退信心。於大乘法。有堪任故。

通則一部論文。皆令於大乘法。增其堪任。別則偏指解釋分中。第三分別修行正道相也。

四爲令善根微少。衆生發起信心。至不退。故

通則一部論文。皆能發起信心。令至不退。別則偏指四修信分。

五爲令衆生消除業障。調伏自心。離三毒。故

通則一部論文。皆可除障。調心。遠離三毒。別則偏指修信分中。四精進門。

六爲令衆生修正止觀。對治凡小過失。心故。

起信發細  
通則一部論文皆是止觀法門。皆可對治凡小。別則偏指修信分中五止觀門。

七爲令衆生於大乘法如理思惟。得生佛前。究竟不退大乘信故。

通則一部論文皆是念佛三昧。皆是往生正因。別則偏指修信分中求生西方極樂法門。八爲顯信樂大乘利益。勸諸含識令歸向故。

此別指第五利益分也。初正明八因竟。  
②二釋疑明意。二初釋疑。二明意。①初中二初。

總釋。二別釋。②今初。

此諸句義大乘經中雖已具有。然由所化根欲不同。待悟緣別是。故造論。

所化謂未來衆生根。謂昔所成種。有上中下。欲謂現所欣樂。有廣中畧。緣謂一切經論能與衆生悟道。作增上緣。當知上中下三根各有廣中畧三種。所欲不同。又與佛菩薩經論各有有緣無緣差別。故應爲有緣三根衆生。逗其喜畧之欲。造此論也。

②二別釋

起信論疏  
此復云何謂如來在世所化利根佛色心勝。一音開演無邊義味。故不須論。

此復云何總徵起也。先釋佛世。次釋滅後。所化利根者。統論佛世衆生。亦有種種三根不同。但對滅後卽皆稱利。以善根不深。不能親值佛故。佛色心勝者。色則相好莊嚴。心則六通十力。故云勝也。一音開演無邊義味者。佛以一音演說法。衆生隨類各得解。譬如一雲所雨。三草二木各得生長也。色勝卽身輪不思議化。心勝卽意輪不思議化。一音

開演卽口輪不思議化。所化既是利根。能化三輪又勝。故不須論。而能開悟也。

佛涅槃後。或有能以自力。少見於經。而解多義。復有能以自力。廣見諸經。乃至解義。

少見於經。能解多義。名爲義持。亦是法行種性。廣見諸經。乃至解義。名爲文持。亦是信行種性。此二種人。亦不須造論也。然據梁本。則廣聞取解在前。似兼文持故勝。據今本。則少見多解在前。似是法行故勝。對實言之。義持文持信行法行。各有利鈍。

非可一向論也

或有自無智力因他廣論而得解義亦有自無智力怖於廣說樂聞畧論攝廣大義而正修行

自無智力故藉他論而樂廣樂畧仍是信行法行二類種性不同亦是文持義持二類熏習有別故也。初釋疑竟

①二明意

我今爲彼最後人故畧攝如來最勝甚深無邊之義而造此論

示大乘體故最勝顯大乘初。故甚深顯大乘用故無邊也。一作因分竟

②二立義二。初標。二釋。③今初

云何立義分。謂摩訶衍畧有二種。有法及法

摩訶衍此翻大乘。略如題日中釋。又七義故名爲大乘。一法太謂方廣經典。二心太謂四弘誓願。三解大。謂圓常信解。四淨太謂淨心地淨二分。別。五莊嚴大謂福德智慧。六時太謂三阿僧祇。七具足大。謂無上菩提。前六是大乘因。後一。是大乘果也。

有法者。梁本云法。猶因明所謂前陳有法。以爲宗  
依。乃指因緣生法。以爲所觀境也。法者。梁本云義。  
猶因明所謂後陳宗體。指所顯理諦。以明大乘義  
也。

④二釋二。初釋有法。二釋法。①今初

言有法者。謂一切衆生心。是心則攝一切世間出世  
間法。依此顯示摩訶衍義。

統論因緣所生。皆是有法。皆悉卽空假中。皆可顯  
示摩訶衍義。故曰。心佛衆生。三無差別。但初機之  
人。若令觀於佛法。則疑太高。若令觀衆生法。則疑  
太廣。所以祇令觀心。又恐人謬謂衆生心外。別有  
真心。故但立一切衆生心。以爲所觀境也。夫舉佛  
法。則攝一切心法。及衆生法。舉衆生法。則攝一切  
佛法。及以心法。今舉衆生現前介爾心法。則攝一  
切衆生法。及佛法。故云攝一切世間出世間法也。  
依此衆生現前介爾心法。顯示摩訶衍義。則一顯  
示。一切顯示。隨舉一一衆生法。一一佛法。無不皆  
是摩訶衍義矣。故法華云。七寶大車。其數無量也。

以此心真如相卽示大乘體故

卽此現前介爾之心不在內不在外不在中間過去無始未來無終現在無際非有相非無相非亦有亦無相非非有非無相非生死相非涅槃相非二邊相非中道相非可說相非不可說相非亦可說亦不可說相非非可說非不可說相不得已故強名爲真如相卽此真如是大乘體更無別體也應立量云衆生心是有法卽大乘體宗因云真如相故同喻如迷悟所依之方方非迷悟

此心生滅因緣相能顯示大乘體相用故

卽此真如不變心體舉體隨緣而有生滅所謂隨於染淨緣具造十法界雖造十界十界皆是假名無性隨緣不變當體卽真故能顯示大乘體也由隨梁緣妄起無明有見不見似不清淨非常非樂非我非淨非寂靜是變異不自在具過恒沙虛妄雜染今翻染成淨無明不起無見不見心性無動無有餘法而可更求卽於真如立大智慧光明義徧照法界義真實了知義本性清淨義常樂我淨

義寂靜不變自在義滿足過於恆沙清淨功德義  
故能顯示大乘相也。由與衆生同在生死輪迴海  
中方肯自憫憫他。發大誓願修大福慧證本法身  
任運起於不思議業。盡未來際利樂有情。故能顯  
示大乘用也。然則現前介爾心體。卽大乘體。現前  
心中惑相卽大乘相。現前心中業用卽大乘用。而  
衆生迷染因緣日用不知。由有迷染因緣方立悟  
淨因緣。由有悟淨因緣方顯體。相用大。故云此心  
生滅因緣相能顯示大乘體。相用也。譬如水結成

冰。則濕體融相潤用皆不可見。若知冰原是水。方  
便令泮方能顯示濕體融相潤用耳。設不觀心生  
滅因緣則不能顯體相用大。如守堅冰無可受用。  
設離衆生現前之心。別求大乘亦不能顯體相用  
大。如大凍時若棄堅冰別無有水。學大乘者幸深  
思之。應立量云。衆生心是有法。能顯示大乘體相  
用宗。因云生滅因緣相故。同喻如依方故迷。因迷  
故悟於方。初釋有法竟。

① 二釋法二。初釋大義。二釋乘義。戊今初

起信論疏  
所言法者略有三種。一體大。謂一切法真如在染在淨性恒平等無增無減無別異故。

前云此心真如相卽示大乘體。今云一切法真如者。以心真如卽一切法真如無二真如故也。一切法卽染法淨法。略則五位百法。廣則百界千如也。隨拈一法。並是真如全體。非是少分。故云性恒平等。悟時無得。迷時無失。又芥子毛端之真如非小。須彌寶剎之真如非大。故云無增無減。一相無相。不可分離。故云無別異也。夫旣言一切法。又言在

染在淨是全約生滅因緣。而隨云性恒平等無增無減無別異。故則知生滅因緣卽是真如門矣。故下文云展轉不相離也。若捨生滅因緣。何由體會真如。若執生滅因緣。又何由了達真如也哉。二者相大。謂如來藏本來具足無量無邊性功德。故此謂衆生現前介爾之心。卽是如來藏也。夫真如不變隨緣。舉體而爲衆生介爾之心。則介爾心便是真如全體。今又名爲如來藏者。是約生滅門中。隱名如來藏顯名法身故也。然法身與如來藏雖

有二名終無二體。故不唯顯名法身之時。具足無量無邊性功德相。卽正在隱名如來藏時。本來具足無量無邊性功德也。

三者用大。能生一切世出世間善因果。故

只此衆生現前介爾之心。無法不具。無法不造。所謂隨於染淨緣具造十法界。徧能出生十界因果。但約九界言之。則三塗等諸惡因果。雖亦此心之用。如以金作穢器。利刀。割泥。無上寶珠。而作彈丸。不名用大。人天有漏因果。雖亦此心之用。如以摩

尼。僅貿一衣一食。不名用大。二乘無漏因果。雖亦此心之用。如空守閻浮檀金。不生息利。不名用大。權乘菩薩五通因果。雖有自利利他之用。如以閻浮檀金。而作商賈貿易。未能統御自在。亦不名用大。雖又希心極果。如以閻浮檀金。作王寶冠。未能拔宅飛昇。亦不名用大。唯有佛乘種性。知此現前介爾之心。體卽真如。具無邊德。便能觀察一切妄念無相。自慙慙他。發大誓願。稱性修習。滅無始無明。證本法身。任運起於不思議業。種種自在作用。

起信論疏  
差別周徧法界與真如等。譬如以閻浮金煉作仙丹。便能拔宅飛昇。遊戲自在。故名用大也。問。果中用大。垂形九界。有時示現三塗。亦應生惡因果。如何。但言善因果耶。答。爲度衆生。示作惡因。本無迷染。卽無漏善。爲度衆生。示受惡果。亦無苦受。如三禪樂。是故但名善因果也。又所言能生一切善因果者。謂果中大用。徧與衆生。作增上緣。令生世出世間諸善因果。非謂旣成佛已。自生世出世間善因果也。以諸佛所有一切變現。皆是真如自在。甚

深之用。皆合涅槃清淨妙德。不可喚作實因果。故問。用大旣約佛果。何名此心生滅因緣相耶。答。若無衆生心。則無大乘體相。若無大乘體相。何處有大乘用。問。旣云真如甚深用。何故不屬真如。乃屬生滅因緣。答。若非生滅因緣。則真如之名。尚自不立。何得辨用大耶。夫衆生現前介爾生滅之心。體自真如。相卽如來藏。用卽能生一切因果。而日用不知。是謂理卽大乘。若能知此一心體大相。大用大。是謂名字卽大乘。若能觀察妄念無相。是謂觀

行卽大乘。若粗垢先落六根清淨是謂相似卽大乘。此論名之爲相似覺若能親證此體相用任運增進是謂分證卽大乘。此論名之爲隨分覺若至心根本性常住現前是謂究竟卽大乘。此論名之爲究竟覺六而常卽始終平等卽此心真如門也卽而常六昇沉碩異卽此心生滅門也。故立一切衆生心爲有法顯示摩訶衍義。初釋大義竟。

④二釋乘義

一切諸佛本所乘故。一切菩薩皆乘於此。入佛地故。

此更約能乘之人以顯所乘之法。故曰言大乘者文殊普賢等一切大人之所乘也。夫一切衆生心莫不具體相用三大卽此三大便名爲乘。而九界衆生不能盡此心大乘之用。枉作羸驢羊鹿水牛諸乘。唯一切佛已乘此大乘到究竟地。一切菩薩皆乘此大乘乃入佛地。故必約衆生心以顯大乘義也。二立義分竟。

大乘起信論裂網疏卷第一

大乘起信論裂網疏卷第二

靈峰滿益沙門智旭述

②三解釋分二初立科二正解 ③今初

云何解釋分此有三種所謂顯示實義故對治邪執  
故分別修行正道相故

顯示實義以除疑對治邪執以去執即是起信分  
別修行正道相即是紹佛種也

④二正解三初顯示實義二對治邪執三分別修  
行正道相 ①初中三初總標二門次各釋二

門三結示不離 (戊)今初

此中顯示實義者。依於一心有二種門。所謂心真如門。心生滅門。此二種門各攝一切法。以此展轉不相離故。

一心卽指衆生現前介爾心也。言二種門者。非是前後左右名爲二也。祇是隨緣不變卽此生滅心名真如門。不變隨緣卽此真如心名生滅門。正所謂是舍唯有一門。亦所謂十方薄伽梵一路涅槃門。但迷之則生死始。則真如舉體而爲生滅。悟之

則輪迴息。則生滅當體便是真如。故約迷悟而明二種門也。又對迷說悟卽生滅門。迷悟平等乃真如門。言此二門各攝一切法者。謂約真如門。則攝百界千如五位百法。一一無非真如。性恒平等無增無減。無別異。故約生滅門亦攝百界千如五位百法。一一無非生滅。以六凡諸法是迷染因緣所成。四聖諸法是悟淨因緣所成。世出世間無有一法不從生滅因緣而顯示。故言以此展轉不相離者。謂離一心真如。則無生滅可得。如離於方別無

迷悟亦如離於濕性別無冰水離一心生滅亦無  
真如可得如離迷悟別無有方亦如離於冰水別  
無濕性也問何故依於一心示二門耶答一切諸  
法法爾有此二門所以諸佛說法常依二諦心真  
如門卽真諦心生滅門卽俗諦雖云二諦唯是一  
法所以二諦圓融不可思議故各攝一切法展轉  
不相離也又全性起逆順兩修名生滅門全逆順  
兩修不改一性名真如門又全理成事名生滅門  
全事卽理名真如門又分別事理名生滅門派絕

事理名真如門又卽權而實名真如門卽實而權  
名生滅門又分別權實名生滅門權實不二名真  
如門又爲實施權依真如門說生滅門開權顯實  
指生滅門卽真如門又爲實施權開權顯實皆生  
滅門理則非權非實名真如門又隨智說則生滅  
卽真如門隨情說則真如卽生滅門隨情智說則  
依於一心有二種門也問旣二門卽是二諦且七  
種二諦如何相攝答若實有爲俗實有滅爲真俗  
卽生滅門中執相應染所攝真則與而言之是生

滅門中相似覺攝。奪而言之。祇是不斷相應染攝。以是分別法執所取境故。若幻有爲俗。幻有卽空。爲真。俗亦執相應染所攝。真乃真如門中空義。少分所攝。若幻有爲俗。幻有卽空。不空共爲真。俗同前攝。真乃生滅門中本覺義攝。亦攝真如門中少分空義。若幻有爲俗。幻有卽空。不空。一切法趣空。不空爲真。俗同前攝。真卽真如門攝。若幻有幻有。卽空。皆名爲俗。不有不空爲真。俗卽生滅門中本覺義攝。亦攝相似覺義。真卽生滅門中本覺義攝。

若幻有幻有卽空。皆名爲俗。不有不空。一切法趣。不有不空爲真。俗同前攝。真卽真如門攝。若幻有幻有卽空。不有不空。皆名爲俗。一切法趣。有趣空。趣。不有不空爲真。俗卽心生滅門。真卽心真如門。方是此論之本旨也。問。五種三諦如何相攝。答。幻有爲俗。同前執相應染所攝。卽空。不空爲真。點此。不空名中道者。空卽真如門中空義。少分中卽生滅門中本覺義耳。若一切法趣空。不空。點此。不空名中道者。空卽真如門中空義。中卽真如門中不

起信論疏二  
四  
空義也。若分幻有、幻有、卽空之俗，以爲真俗兩諦。指不有不空之真名中諦者，俗是執相應染所攝，真是相似覺攝，中是本覺攝也。若一切法趣中者，俗與真仍同前攝，中乃真如門中不空義攝也。若圓妙三諦者，真卽真如門中空義，俗卽全攝生滅門中覺不覺義，中卽真如門中不空義也。一心二門展轉不相離故，所以一心三諦圓融不可思議。須知理中本具三諦，但以理融事則無事而非理，故束三爲二事中亦具三諦，但以事顯理則無理。

而非事，故束三爲一也。

④次各釋二門。二初釋心真如門。二釋心生滅門。

⑤初中二。初正釋此心真如相。二卽示大乘體。

⑥初又二。初正詮法體。二明隨順悟入。

⑦又二。初借言詮法。二顯法離言。

⑧今初

心真如者卽是一法界大總相法門體，以心本性不生不滅相，一切諸法皆由妄念而有差別。若離妄念則無境界差別之相，是故諸法從本已來性離語言。一切文字不能顯說，離心攀緣，無有諸相，究竟平等。

永無變異。不可破壞。唯是一心。說名真如故。

心卽指衆生現前介爾之心。真謂其性不妄。以非肉團亦非緣影。非有內外中間。過現未來。分劑方隅等妄相故。如謂其性不異。無生無滅。無垢無淨。無增無減。無別異故。蓋真如不變隨緣。舉體而爲衆生現前介爾之心。此心隨緣不變。仍卽真如法界全體。故云卽是一法界大總相法門體也。從來無二。強名爲一。諸法本源。強名法界。絕待無外。強名曰大。一相無相。無差別相。強名總相。可軌可持。

強名爲法。無所不通。強名爲門。譬如大海舉體成漚。研此一漚。別無自體。唯攬大海濕性爲體。只此一漚。濕性便是大海全體濕性。更非有二性。更非有別相故。又如日光舉體入隙。研此隙光。別無自體。唯攬日輪光明爲體。只此一隙。明性便是日輪全體明性。更非有二性。更非有別相故。以心本性。下釋成此義。謂以衆生現前介爾心之本性。前無始故不生。後無終故不滅。譬如虛空。非是暫有。非可暫無。而亦不同虛空對色所顯之相。故不得已。

起信論疏卷二  
強名之爲不生不滅相也。此中應有問曰。經中每言心生法生。心滅法滅。今現見一切諸法種種生滅差別。豈非卽是心之生滅。胡云不生不滅相耶。故今釋曰。一切諸法皆由妄念而有差別。譬如瞽目妄見空華。若離妄念則無境界差別之相。譬如瞽病旣除則無空華起滅相也。是故心之真如卽是諸法真如。諸法真如卽心真如。心旣從本已來性離語言。一切文字不能顯說。離心攀緣無有諸相。究竟平等。永無變異。不可破壞。所以諸法亦卽

從本已來性離語言。乃至不可破壞也。是則一切諸佛一切衆生一切假實國土究竟唯一淨心爲體。一心之外更無餘法。故不得已說名爲真如也。

⑤ 二顯法離言

從本已來不可言說不可分別。一切言說唯假非實。但隨妄念無所有故。言真如者此亦無相。但是一切言說中極以言遣言。非其體性有少可遣。有少可立。此明心真如性卽是一切法真如性。言語道斷。故不可言說。心行處滅。故不可分別。且如世間諸物。

尚且煥火不熱煥水不濕故亦不可言說。念火不  
燒念水不浸故亦不可分別。况復真如第一義諦  
離過絕非唯是自覺聖智之所冥證。如何而可言  
說及分別耶。以一切言說唯是假名。非有實義。但  
隨妄念之所強立。畢竟無所有故。此中應有問曰。  
既云不可言說。則真如二字獨非言耶。既云不可  
分別。則真如不生滅。相獨非相耶。故今釋曰。言真  
如者。此亦無相。但是一切言說中極以言遣言而  
已。如唯識論云。真如亦是假施設名。遮撥爲無故。

說爲有。遮執爲有。故說爲空。勿謂虛幻。故說爲實。  
理非妄倒。故名真如。不同餘宗離色心等有實常  
法。名曰真如。文卽是言說中極以言遣言之旨也。  
又恐迷者聞此遣言。謬計有法可遣。故云非其體  
性有少可遣。仍恐迷者聞說無遣。謬計有法可立。  
故云非其體性有少可立。夫非少可遣。則非頑空。  
非少可立。則非幻有。由非幻有。故成真實空義。由  
非頑空。故成真實不空義也。梁本云。此真如體。無  
有可遣。以一切法悉皆真故。亦無可立。以一切法

皆同如故。大佛頂經云。五陰六入十二處十八界  
生滅去來皆如來藏妙真如性。卽是無可造義。又  
云。性真常中。求於去來迷悟生死。了無所得。卽是  
無可立義。初正詮法體竟。入我必可數限我應空  
⑧二明隨順悟入。我法界無量壽者皆在  
問曰。若如是者。衆生云何隨順悟入。答曰。若知雖說  
一切法而無能說所說。雖念一切法而無能念所念。  
爾時隨順。妄念都盡。名爲悟入。

真如卽是一切法之實性。亦是一切說之實性。亦

是一切念之實性。故原不在一切法。一切說一切  
念外。但以不變隨緣。舉體而爲能說所說。能念所  
念。隨緣不變。舉凡能說所說。能念所念。皆是真如  
性。恒平等。無別異。故衆生不知於真如平等法中。  
妄計能所說念。以爲實有。則是違逆真如。然終不  
出真如性外。亦可名爲理。卽隨順。若卽此妄念。聞  
大乘法。能知無性。是爲名字隨順。若令此知念念  
相續。以成思慧。是爲觀行隨順。若令此知任運。淳  
熟。以成修慧。是爲相似隨順。若由此知助發妙觀。

趙伊萊續二  
察智觸證真如是爲妄念都盡。卽是分證隨順。轉  
名爲悟入也。問妄念都盡。應是究竟位相。何名分  
證。答。真見道時。一切分別不現行故。所證真如無  
分劑故。亦得名都盡也。此後所有增進。並是無漏  
智品。名爲真修。不同有漏聞思修慧名爲緣修。是  
故不復名妄念也。問真修增進。固不名妄念矣。出  
觀之時。仍有微細無明妄念現行。那名都盡。答。出  
觀偶起微細妄念。卽不名爲隨順。所謂唯聖罔念  
作狂也。名字能知妄念無性。亦卽名爲隨順。所謂

唯狂克念作聖也。以要言之。理卽純逆。究竟純順。  
名字以上等覺以下。皆悉逆順相雜。譬如初夜白  
月至十四夜。明雖漸增。黑相未盡。但分證已得。無  
漏永不退轉。譬如哉生明月。光照大地。亦得名爲  
妄念都盡也。初正釋此心真如相竟。

②卽示大乘體二。初略標釋。二廣釋成。 (準今

初

復次真如者。依言說建立有二種別。一真實空。究竟  
遠離不實之相。顯實體故。二真實不空。本性具足無

邊功德有自體故  
真如離言說相。仍依言說建立者。望下生滅門故。  
強於無名相體。借此假名說之。令人因假名。指得  
見實體月也。然真如尚非是一。安有二別。特以徧  
計本無依他如幻。故名爲真實空。圓成本具復名  
真實不空。由空徧計依他方顯圓成不空。譬如了  
蛇非有。達繩非實。方顯麻體不空。由見圓成不空。  
方信徧依非有。譬如見麻四微。則知蛇固本無繩。  
亦非實也。只此衆生現前。介爾心性本無實我實

法亦無五位百法百界千如差別。幻相故云究竟  
遠離不實之相。由此顯示心性全妄。卽真常獨  
露。故云顯實體也。旣顯實體。則知此心本性法爾  
具足。無邊功德。所謂理具三千。事造三千。一切德  
相。一切業用。同真如體。無分別故。故得塵塵華藏  
一念念毘盧。互徧互融。亦無所在。以空與不空。唯是  
一心真如體故。此真如體卽是大乘體也。  
④二廣釋成三。初釋空義。二釋不空義。⑤今初  
復次真實空者。從本已來。一切染法不相應。故離一

起信論疏二  
一切法差別相故。無有虛妄分別心故。應知真如非有相非無相非亦有亦無相非非有非無相非一相非異相非亦一亦異相非非一非異相略說以一切衆生妄分別心所不能觸證故立爲空。據實道理妄念非有空性亦空。以所遮是無能遮亦無故。

此申明真實空者。但表真如體上本無染妄。故以空字遮其妄有。非指此空以爲真如體也。現前介爾心性從本已來覓之了不可得。如何得與染法相應。如何得有差別法相。何處可容虛妄分別。是

故有無四相。一異四相無不皆空。乃至一切妄分別心總不能觸證此心性也。然雖云妄分別心所不能觸。只此妄分別心便自覓之了不可得。乃至一切染法本不可得。一切差別本不可得。豈俟以空遣之。然後空耶。若遣妄存空空仍是妄。今言空者。但遮妄念以明本空。非指此空爲真如也。

⑤ 二釋不空義

言真實不空者。由妄念空無故。卽顯真心常恆不變淨法圓滿故名不空。亦無不空相。以非妄念心所行

故唯離念者之所證故

此申明真實不空者但能了達妄念本空卽顯真心常恒不變淨法圓滿故以不空表之不同妄念所計不空相也若以妄念所計不空爲真如相則同餘宗所計離色心等有實常法名爲真如其謬甚矣文中常恒是常德不變是我德淨法是淨德圓滿是樂德四德不可思議故唯離念者之所證也初釋真如門竟

②二釋心生滅門二初正釋此心生滅因緣相二

顯示大乘體相用

①初中二初明染淨生滅

二明染淨熏習

②初中三初正釋心生滅二

明生滅因緣三辨生滅之相

③初又三初釋

名列表義二依義各釋三總辨同異

④今初

心生滅門者謂依如來藏有生滅心轉不生滅與生滅和合非一非異名阿賴耶識此識有二種義謂能攝一切法能生一切法復有二種義一者覺義二者不覺義

如來藏者卽是真如真如不變隨緣舉體而成生

滅。今不言依真如有生滅心轉。乃言依如來藏有生滅心轉者。蓋以真如目此心之體。如指水之濕性。以如來藏目此心之相。如指濕性之水也。真如既不生滅。故如來藏亦不生滅。真如舉體隨緣。故依第八如來藏而有前七識生滅心轉。此前七識並依第八識起。並攬真如爲體。如依水起波波。亦以濕爲體也。第八識與前七識展轉相依。互爲因果。如水與波故名和合。能熏所熏相別故非一。同以真如爲體故非異。由有能藏所藏執藏義故所

以復受阿賴耶名。

阿賴耶此翻藏

由其體卽真如故能攝

一切法。由其受熏持種故能生一切法也。問。賴耶

體卽真如。賴耶能攝一切法者。真如舉體成賴耶

真如亦應生一切法。答。其理實然。但約不變隨緣

名如來藏。亦名賴耶。故可云生一切法。若約隨緣

不變。乃名真如。但可云攝一切法。皆不生滅。不可

云生一切法也。問。真如旣不得云生一切法。賴耶

亦不得云攝一切法。答。賴耶全攬真如爲體。非是

真如少分。故能攝一切法也。攝一切法卽是理具

三千。生一切法卽是事造三千。由有理具方有事造。由有事造方顯理具。若不攝一切法安能生一切法。若非生一切法安顯攝一切法。又真如與賴耶不一不異。由不異故。並云攝一切法。由不一故。真如不云生一切法也。又真如不變隨緣。不唯舉體。作如來藏阿賴耶識。亦卽舉體作諸轉識。及一切法。譬如濕性。不唯舉體作水。亦卽舉體作波。是故一一轉識及一切法隨緣不變。皆是真如全體。非是真如少分。當知一一轉識及一切法據實道。

理無不各各皆能攝一切法。生一切法。今但明賴耶能攝能生者。姑就生滅門中異相言之。若約同相。則並是真如全體。並具真如大用也。又前七轉識相雖生滅。體卽真如本不生滅。如來藏體雖不生滅。旣隨因緣相亦生滅。今但以生滅心指七轉識不生滅。指如來藏者。姑就生滅門中非一之義言之。若約非異之義言者。七識生滅卽是藏識。生滅藏識不生滅。卽是七識亦不生滅。故楞伽經云。七識不流轉不受苦樂。非涅槃因。卽七識不生滅。

起信發綱二  
義又云如來藏者受苦樂與因俱若生若滅卽藏識生滅義也言復有二種義者謂此藏識中無始已來法爾本具無漏智德種子能生無漏諸法名爲覺義法爾本具有漏無明種子能生有漏諸法名不覺義也問下文釋覺義云謂心第一義性卽是一切如來平等法身說爲本覺何得以無漏種子釋之答真如不變隨緣舉體而爲無漏有漏若種若現故下文云如是無漏無明種種幻用皆同真相夫無明種現尚同真相况無漏種現豈不卽

是第一義性豈不卽是一切如來平等法身耶良由無漏種子本自有之故名本覺四智心品初起現行故名始覺佛果所成四智心品卽同無漏種子全體真如無增無減平等平等故云始覺卽本覺也幸捨舊執而痛思之

④二依義各釋二初釋覺義二釋不覺義 ⑤初

中三初總立本始兩覺二別辨本始兩覺三總

顯四種大義 ⑥今初

言覺義者謂心第一義性離一切妄念相離一切妄

起信論疏卷二  
相  
念相故等虚空界無所不徧。法界一相卽是一切如來平等法身。依此法身說一切如來爲本覺。以待始覺立爲本覺。然始覺時卽是本覺無別覺起。立始覺者謂依本覺有不覺。依不覺說有始覺。

心者卽指衆生現前介爾心也。第一義性者指無漏種子無始成就不改名性也。離一切妄念相者謂此無漏種子雖復依附本識而非本識所能緣也。等虚空界無所不徧者謂此無漏種子性順真如。非有方隅形相可局也。法界一相者謂此無漏

種子旣順真如卽與真如法界同一不思議相也。卽是一切如來平等法身者謂智與真如平等平等。只此如如及如如智乃是一切如來之所同證。總名爲法身也。依此法身說爲本覺者謂雖似新成實是舊佛也。以待始覺立爲本覺者謂雖是舊佛不妨新成也。然始覺時卽是本覺無別覺起者謂種子舉體而爲現行現行不改無始種子。如水成冰冰還成水非別有新水也。應有問曰旣云無別覺起何得名爲始覺。故今答曰依本覺有不覺

如冰成水。依不覺說。有始覺如冰。始泮而爲水也。更依下文。以喻明之。如來藏卽真如。譬如東西定。方非迷。非悟。能爲迷。悟。依也。既有此東西定。方卽應有此知東知西之知。是定方中所具本覺義也。從來未曾知故名之爲迷。是定方中所具不覺義也。由不覺故。謂東爲西。謂西爲東。是定方中所起轉識妄想相也。定方或隨迷緣。或隨悟緣。決無不隨緣時。故有覺與不覺二義。名生滅門。迷亦此方。悟亦此方。決定不從緣變名真如門。迷則迷此真

如以成生滅而對迷說。悟故悟亦須屬生滅門。所謂言妄顯諸真。妄真同一二妄也。悟則悟此生滅。卽是真如。而真無迷悟。故迷亦並歸真如門。所謂一切衆生。卽涅槃相。不可復滅。卽菩提相。不可復得也。唯識亦明諸法種子。唯世俗有。非真勝義。卽同依方。故有迷悟兩法。又明真如卽是識之實性。非離色心之外。別有真如。卽同依迷悟。故而辨於方。除卻迷悟兩心之外。又豈別有方可得哉。嗚呼。馬鳴護法。決無二旨明矣。

起信論疏  
二  
期  
⑤ 二別辨始本兩覺。二初辨始覺義。二辨本覺義。  
④ 初中三。初總標淺深。二詳示淺深。三明淺深  
無性。④今初

又以覺心源故名究竟覺。不覺心源故非究竟覺。  
尅論藏識所有覺義卽是五別境中慧心所耳。此  
慧心所亦全攬真如爲體。故能攝一切法生一切  
法。如外道凡夫諸人我見。凡外二乘諸法我見。卽  
是染慧。如一切世間所有聰明善巧。卽無記慧。如  
一切世間所有正見。卽有漏善慧。如三乘所有生

空智品。卽無漏慧。亦名爲共般若。如大乘所有法  
空智品。亦無漏慧。復名不共般若。如諸佛所有四  
智心品。卽不思議慧。亦名無上菩提。又加行無分  
別智。卽是有漏聞思修慧。根本無分別智。卽是實  
慧。後得無分別智。卽是權慧。又因中照理名道慧。  
照事名道種慧。果上照理名一切智。照事名一切  
種智。又或照真名一切智。照俗名道種智。照中名  
一切種智。如此種種異名。種種開合。皆是一慧心  
所。皆是此中所謂覺義。或但取無漏乃名覺耳。唯

起信要解 二  
有諸佛四智菩提方能覺盡心之本源名究竟覺  
降此皆非究竟覺也

卯二詳示淺深

如凡夫人前念不覺起於煩惱後念制伏令不更生  
此雖名覺卽是不覺

不覺卽是無明無明卽根本煩惱中之癡心所也  
此癡心所亦全攬真如爲體故亦攝一切法生一  
切法若與第七識相應之法我癡名爲根本無明  
卽下文所謂不如實知真法一故者也此之現行

平等性智現在前時方伏此之種子直至將成佛  
時金剛喻定方斷斷此卽名爲佛若與第七識相  
應之人我癡名爲恒行不共無明須至三乘證無  
學時方斷若與第六識相應之法我癡則有二種  
一是分別法癡登初地時頓斷一是俱生法癡於  
十地中分分漸斷至成佛時乃盡若與第六識相  
應之人我癡亦有二種一是分別我癡三乘初見  
道時頓斷一是俱生我癡三乘修道位中分分漸  
斷證無學時方盡若與前五識相應之俱生癡隨

第六識而爲有無乃至佛果方始斷盡是則由此  
癡故有六凡法界由轉此癡爲無癡故有四聖法  
界豈非能攝一切法能生一切法耶今言凡夫人  
前念不覺者且約第六識相應之或分別癡或俱  
生癡言之以第七識癡必恒行不待言故起於煩  
惱者謂起前六識相應之貪瞋等惑也後念制伏  
令不更生者卽是或以世間正見或以有漏聞思  
二慧爲對治也此雖名覺者以是善慧故也卽是  
不覺者以其未是無漏故也

如二乘人及初業菩薩覺有念無念體相別異以捨  
粗分別故名相似覺

二乘人通指有學無學言之初業菩薩於共十地  
中卽指八人見地已上言之於三賢十聖中卽指  
初發心住已上言之由其已斷分別我癡已證生  
空所顯真如故能覺於出觀之有念入觀之無念  
其體稍有別異也棄捨見思二惑名爲捨粗分別  
但得生空無漏未得法空無漏故僅名相似覺也  
如法身菩薩覺念無念皆無有相捨中品分別故名

隨分覺

頓斷分別法執捨異生性障證徧行真如得中道  
佛性故名法身菩薩既證真如法身則知真如之  
體本非生死之有念亦非涅槃之無念。但以不變  
隨緣則真如舉體爲念無念。隨緣不變則念無念  
皆卽真如。何有二相。從此漸斷俱生法執故云捨  
中品分別也。已得法空無漏但未窮源是故名隨  
分覺。猶所云分證卽佛也。

若超過菩薩地究竟道滿足。一念相應覺心初起。始

名爲覺遠離覺相微細分別究竟永盡。心根本性常  
任現前。是爲如來名究竟覺。

超過菩薩地者。等覺後心入於金剛喻定也。法空  
無漏妙觀察智名究竟道。從初證法身後。分分增  
進至此滿足。令異熟識中有漏種子捨無不盡。轉  
成菴摩羅識卽與大圓鏡智忽得相應。故云一念  
相應覺心初起也。始名爲覺者。釋成究竟始覺義  
也。遠離覺相者。釋成卽是本覺無別覺起義也。微  
細分別究竟永盡者。無間道中捨異熟識種也。心

根本性常任現前者。解脫道中證本具法身也。如  
者。本覺真如之性。來者。始覺合本之修。始本合一  
故爲如來。始本兩忘。故名究竟覺也。

是故經說。若有衆生。能觀一切妄念無相。則爲證得  
如來智慧。

夫真如佛性。不變隨緣。舉體而爲一切妄念。如水  
成冰。則一切妄念。隨緣不變全體。卽是真如佛性。  
如冰卽攪水成相。豈別有自相哉。由諸凡夫。不達  
妄念無相。故雖能制煩惱。仍名不覺。由二乘人及

初業菩薩。亦不達妄念無相。妄計有念無念。體相  
別異。故雖證得生空。無漏。僅可名相似覺。若以實  
理奪之。猶名不覺。直至證法身已。方能覺念無念。  
皆無有相。方可名隨分覺。是故經說。若有衆生。始  
從凡地。卽能觀一切妄念無相。則爲證得如來智  
慧也。須知一切衆生。雖復妄計妄念有相。而妄念  
實本無相。是謂理卽證得如來智慧。故圓覺云。一  
切衆生。皆證圓覺。若知妄念無相。便是名字證得。  
若能觀妄念無相。便是觀行證得。若觀至六根清



而未離也。一瞥在日空華亂墜。不見已頭。狂怖妄  
出。然所治之無明。畢竟求不可得。則能治之始覺  
又豈有初相可得哉。

若妄念息。卽知心相生。任異滅。當悉無相。以於一心  
前後同時。皆不相應。無自性故。上應真一應過之味  
由迷一心。而有妄念。由有妄念。妄見心相生。任異  
滅。但當推求現前一念心相。畢竟了不可得。則計  
有心相之妄念自息。妄念既息。則知心相尚不可  
得。云何得有生任異滅之相。蓋若謂生任異滅。果

有相者。爲生在前耶。任異滅在前耶。生在後耶。任  
異滅在後耶。抑生任異滅皆同時耶。若謂生在前  
者。爲有心故。生爲無心故。生。若有心故。生。則有二  
心。若無心故。生。心則有始。又所生心。果有何相。故  
生在前。不相應也。若任異滅在前者。必須有生方  
得有任異滅。前既無生。云何有任異滅。故任異滅  
在前。不相應也。若謂生在後者。前既無生。云何後  
忽有生。又由滅故。方說有生。前既無生。則無可滅。  
前既無滅。後豈有生。故生在後。不相應也。若任異

滅在後者。前必無滅。前既無滅。亦無有生。前既無  
生。云何得有後。任異滅。故任異滅。在後不相應也。  
若謂生任異滅。皆同時者。生與滅違。任與異違。尤  
爲不相應也。如此推責。則知生任異滅。但有名字。  
何嘗有自性耶。

如是知已。則知始覺不可得。以不異本覺故。

本覺離一切妄念。相等虛空界。無所不徧。法界一  
相。無生無任無異無滅。今推始覺亦無生任異滅。  
可得。則與本覺何異。是則約隨俗說。故有凡夫不

覺。三乘相似覺。法身隨分覺。如來究竟覺之不同。  
而真如覺性。何曾有此淺深差別之可得哉。初辨  
始覺義竟。

①二辨本覺義二。初標二相。次釋二相。②今初  
復次本覺隨染分別。生二種差別相。一淨智相。二不  
思議用相。

本覺既卽平等法身。離一切妄念相。云何得有二  
差別相。特以隨染分別說有始覺。由始覺故。方顯  
本覺相用。故無生而說生也。

趙信彙編二  
⑧次釋二相二。初釋淨智相。二釋不思議用相。

⑨初中二。初示相。二釋成。⑩今初。

淨智相者。謂依法熏習。如實修行。功德滿足。破和合識。滅轉識相。顯現法身清淨智故。

淨智相卽四智相應心品也。依法熏習者。具如下文所明。妄熏。真熏。體熏。用熏也。如實修行者。隨順法性而修諸行也。功德滿足者。超過菩薩究竟地也。破和合識者。捨異熟名。轉成大圓鏡智相應心品。不復爲所熏也。滅轉識相者。轉第七識爲平等

性智相應心品。轉第六識爲妙觀察智相應心品。轉前五識爲成所作智相應心品。無增無減。不復爲能熏也。顯現法身清淨智故者。所證真如爲法身能證。菩提爲清淨智。智與真如平等。平等無能所也。

⑪二釋成

一切心識相卽是無明相。與本覺非一非異。非是可壞。非不可壞。

一切心識相者。通指八個心王兼攝相應諸心所。

也。卽是無明相者。由無始來曾未悟。故俗故相有別也。與本覺非一非異者。真如舉體而爲本覺。無明本覺是無漏性。無明是有漏性。故非一。同攬真如爲體。故非異也。非是可壞者。無明之性卽真如。故與本覺非異。故非不可壞者。無明之相違真如。故與本覺非一。故

如海水與波非一非異。波因風動。非水性動。若風止時。波動卽滅。非水性滅。

此舉喻以釋成也。海水喻如來藏心。波喻前七轉

識。風喻無明心所。水之動相卽名爲風。風原不在水外。喻心之不覺卽名無明。無明心所恒與心王相應。不在心王外也。然水有可動之性。卽喻無明種子。藏在第八識中。波有動轉之相。卽喻無明現行。但與前七識相應也。藏識常住。轉識生滅。如水與波非一。藏識亦攬真如爲體。轉識亦攬真如爲體。如水與波非異。以其同一濕性故也。波因風動。則舉水體皆動。喻不唯七識生滅。卽藏識亦生滅也。非水性動。則波之濕性亦不會動。喻不唯藏識

性無生滅卽轉識亦性無生滅也。若風止時者。喻無明轉而爲明也。波動卽滅者。喻和合識與轉識相俱滅。不爲所熏能熏也。非水性滅者。喻八識轉成四智相應心品。向於真如常住不滅也。

衆生亦爾。自性清淨心。因無明風動起識波浪。如是三事皆無形相。非一非異。然性淨心是動識本。無明滅時。動識隨滅。智性不壞。

此更以法合也。自性清淨心。卽指現前介爾心性。體卽真如本來清淨。非成佛而始淨也。因無明風

動者。無始已來從未悟故。法爾有八種識。第八識中法爾有無明種子。如水合動性。前七識現行。法爾與無明相應。如波有動相也。起識波浪者。如海水舉體作波也。如是三事皆無形相者。譬如指波所依名水。指水所起名波。指波之動名風。水外別無波動形相。波外別無水動形相。動外別無波水形相。說有三事故非一。同依濕性故非異。衆生亦爾。藏識之外別無轉識無明形相。轉識之外別無藏識無明形相。無明之外亦別無藏識轉識形相。

說有第八。前七。心所三事故非一。同一真如淨心。故非異也。然性淨心。是動識本者。如水之濕性。是水波本也。無明滅時。動識隨滅者。合風滅時。波動隨滅。不唯前七能熏相滅。卽第八受熏和合相亦滅也。智性不壞者。合前非水性滅。不唯大圓鏡智之性不壞。卽平等性智妙觀成所作智之性。亦不壞也。初釋淨智相竟。

② 二釋不思議用相

不思議用相者。依於淨智能起一切勝妙境界。常無

斷絕。謂如來身。具足無量增上功德。隨衆生根。示現成就無量利益。

依於淨智能起一切勝妙境界等者。唯識論云。此四心品。雖皆徧能緣一切法。而用有異。謂大圓鏡智相應心品。純淨圓德。現種依持。能生身上智影。無間無斷。窮未來際。平等性智相應心品。觀一切法。自他有情。悉皆平等。大慈大悲。恒共相應。隨諸有情所樂。示現受用。身上影像差別。妙觀察智不共所依。無任涅槃之所建立。一味相續。窮未

來際。妙觀察智相應。心品善觀諸法。自相共相無礙而轉。攝觀無量總持之門。及所發生功德珍寶。於大眾會能現無邊作用。差別皆得自在。兩大法雨。斷一切疑。令諸有情皆獲利樂。成所作智相應。心品爲欲利樂諸有情故。普於十方。示現種種變化三業。成本願力所應作事。此四種性。雖皆本有。而要熏發。方得現行。因位漸增。佛果圓滿。不增不減。盡未來際。但從種生。不熏成種。勿前佛德勝後佛故。文是知前淨智相。及從鏡智所起最極圓滿淨

常徧色身。卽是自受用身功德。此中依於淨智所起。身上境界。隨衆生根成就利益。卽是他受用報勝劣等。應種種功德。此二功德。皆由本覺隨染分別。流轉生死。然後翻染成淨。依法熏習。如實修行。之所證得。故前文云。生二種差別。相猶唯識名所生得也。雖所生得。然不名之爲始覺。相仍名本覺相者。猶唯識云。此四種性。皆本有也。大佛頂經亦云。圓滿菩提。歸無所得。良以本具無漏種子。原是眞如全體原具。眞如相用。未嘗稍減。今佛果無漏

現行亦祇是真如全體相用未嘗稍增故也。二別辨本始兩覺竟

⑤三總顯四種大義

復次覺相有四種大義清淨如虛空明鏡

前明阿賴耶識有其覺義。又明依不覺說始覺待始覺立本覺。而始本究竟不異。故今直明覺相四種大義也。本無垢染故名清淨。本無形相方隅分劑可得故如虛空。本來寂照故如明鏡。蓋但言如虛空則無以顯其照用。但言如明鏡則無以顯其體相。故必合言如虛空明鏡乃可稍管於覺相也。一真實空大義。如虛空明鏡。謂一切心境界相及覺相皆不可得故。

此卽真如門中依言說建立之真實空也。謂阿賴耶中無始無漏種子全攬真如爲體。真如非一切心非一切心所現境界亦非覺相。一切皆空。故此無漏種子亦非一切心境界相及與覺相。譬如虛空體非羣相。譬如明鏡本無纖塵也。

二真實不空大義。如虛空明鏡。謂一切法圓滿成就。

無能壞性。一切世間境界之相皆於中現。不出不入。不滅不壞。常任一心。一切染法所不能染。知體具足。無邊無漏功德。爲因熏習一切衆生心故。

此卽真如門中。依言說建立之真實不空也。謂阿賴耶中無始無漏種子。卽全攬一切法圓滿成就。無能壞性之真如爲體。是故一切世間境界之相。皆於無漏種子中現。無漏種外。別無一切境界。故不出。一切境界之內。別無無漏種子。故不入。由不出。故不滅。境卽真如無可滅故。由不入。故不壞。真

如卽境無可壞故。又性色真空。性空真色。清淨本然。周徧法界。故不入不入。隨衆生心。應所知量。循業發現。故不滅不壞。又隨緣不變。故不出不入。不變隨緣。故不滅不壞。又如虛空含育萬物。明鏡影現衆形。並不出不入。不滅不壞也。是故無漏種子。當體卽是常任一心。雖此常任一心。舉體而爲一切染法。如水成冰。然此一切染法。本無自性。云何能染此無漏種。如冰不能改其本然之濕性也。只此無漏種子。便是菩提智體。本來具足。無邊無漏。

起信論疏二  
功德以其在纏故名爲因。因卽種子之異名也。此無漏因亦名佛性。佛性雄猛無能沮壞。雖在一切衆生阿賴耶識心中。力能熏習令妄念心厭生死苦。求涅槃樂也。此上二種大義卽大乘體。

三真實不空離障大義。如虛空明鏡。謂煩惱所知二障永斷。和合識滅。本性清淨常安住故。

此卽本覺隨染分別所生淨智相也。雖由始覺所顯不異在纏本覺。卽是大乘相也。離煩惱所知二障卽顯真如門中真實空義。本性清淨安住卽顯

真如門中真實不空爲顯不空之相。故建立空是。故但名真實不空離障大義。此如無雲之太空。磨瑩之古鏡也。

四真實不空示現大義。如虛空明鏡。謂依離障法隨所應化。現如來等種種色聲。令彼修行諸善根故。

此卽本覺隨染分別所生不思議用相也。隨所應化卽意輪觀機現種種色。卽身輪示化現種種聲。卽口輪說法。此如太空之含有萬物明鏡之顯寫千容也。具問阿賴耶識中覺義由其全攬真如爲

體故得具此四種大義。其不覺義亦全攬真如爲體。亦得具此四種大義否。答。具。以不覺相不可得故。一切法皆不可得。卽真實空大義。以不覺相既不可得。卽一切法圓滿成就無能懷性。一切世間境界之相皆於不覺中現。出不入。不滅不壞。常任一心。一切染法所不能染。一切淨法所不能淨。不覺具足無邊無漏功德。爲因熏習一切衆生心。故卽真實不空大義。以達此不覺之性卽是真實不空體故。二障永斷本性常任。卽是離障大義。以

此不覺之性離二障故。隨所應化。現如來等種種色聲。令修善根。卽示現大義也。問。旣言真如舉體作一微塵。則隨拈一一微塵亦各具此四種大義否。答。具。以微塵相若無方分。則非微塵。以無形故。若有方分。則可分析。定非實有。推此微塵既無相。故則一切法亦皆無相。卽真實空大義。微塵之相既不可得。卽一切法圓滿成就無能壞性。一切世間境界之相皆於微塵中現。出不入。不滅不壞。乃至微塵具足無邊無漏功德。爲因熏習一切衆

走信裂網二  
生心故。卽真實不空大義。以達此一微塵性。卽是  
真實不空體故。二障永斷。本性常任。卽是離障大  
義。以此一微塵性。離二障。故隨所應。化現身說法  
令修善根。所謂於一毛端。現寶王刹。坐微塵禪轉  
大法輪。卽示現大義也。華嚴經云。一微塵中。具足  
大千經卷。如一微塵。一切微塵。亦復如是。此之謂  
也。思之。初釋覺義竟。

大乘起信論裂網疏卷第二

大乘起信論裂網疏卷第三

靈峰滿益沙門智旭述

①二釋不覺義。二。初總明不覺。依覺故無實。二別

示不覺虛妄相。

②今初

不覺義者。謂從無始來。不如實知真法一故。不覺心  
起。而有妄念。然彼妄念。自無實相。不離

真

本覺

此心。前際決不可得。故云從無始來。真如但有性  
德。隨緣之能。未有修德。照性之智。故云不如實知。  
雖有八識及諸心所體。及相見四分差別。但如幻

起信論三  
事體卽真如故云真法一故。只此不如實知便是無始已來從未悟故名爲根本不覺亦名無始任地無明種子。此種雖在第八識中不與第八現行相應。所以下文名爲不相應無明也。由此無明種子令前七識心非起似起。由八識心起現行故便有徧行別境等諸心所法相應俱起。故云有妄念也。然此心王心所若種若現並是無始法爾成就並攬真如全體爲體別無自體。故云自無實相。不離本覺。此本覺字卽指真如。不指賴耶識中無漏

種子。蓋真如雖徧爲迷悟依非覺非不覺而不覺違於真如故。但得云無實覺則順於真如。真如本無不覺。故或有時卽呼本覺爲真如。或復有時卽呼真如爲本覺也。問卽謂妄念不離無漏種子亦何不可答。約真如門。理實無礙約生滅門。則無漏種不生有漏現行故也。况無漏種亦非真如之外別有實法。但此真如理性雖無始來從未曾悟法爾有此應正了知之理。卽目此法爾應正了知道理名爲無漏種子。今無明但是不了真如而起非

謂應正了知道理之上反能生於不正了知也

猶如迷人依方故迷迷無自相不離於方

東西定方以喻真如其定方而正了知以喻覺  
義迷東爲西以喻不覺妄念方非迷悟爲迷悟依  
悟方之時方外別無悟相可得以喻如外無智迷  
方之時方外別無迷相可得以喻真如之外別無  
妄念是故妄念自無實相也問若言東西有定方  
者何故大智度論破云若以日出處爲東則俱虛  
洲日於此處沒復名爲西勝神洲日於此處午復

名爲南半貨洲日於此處成半夜復名爲北今言  
定方如何可通答大凡譬喻皆就目前人所共知  
以易例難以淺况深而已如滿月喻面豈可求其  
眉鼻雪山喻象豈可責其尾牙然卽汝所引益顯  
妙義若就此洲則東西有定定方之外無別知相  
可喻如外無智若約四洲則東西無定各隨衆生  
所知立名所知之外無別實方可喻智外無如若  
互奪則兩亡故云都無所得離二取相若雙照則  
宛爾故云唯有如如及如如智也問譬如迷方須

人指示。衆生無始已來從未曾悟。則最先一佛仗誰指示。答。約真如門尚無成佛與不成佛。何有先後。約生滅門。則譬如曠野迷方。無人可問。但當諦觀日影去來之相。便識東西。衆生亦爾。若能諦觀生老病死之相。便能覺悟。故紫相大師云。最先一佛以苦諦爲師也。

衆生亦爾。依於真覺性故。而有不覺。妄念迷生。然彼

不覺。自無實相。不離真本覺。復待不覺。以說真覺。不

覺。既無真覺。亦遣口。

此以法合喻也。覺及本覺。卽合方字。仍指真如言之。復待不覺。以說真覺。謂猶迷方而說悟方。此真覺字。卽指究竟始覺言之。始覺合本。無復本始之異。本覺卽真。無復理智之分。故云真覺亦遣也。初總明不覺。依覺故無實竟。

⑤二別示不覺虛妄相。

復次依放逸。故而有不覺生。三種相不相捨離。一無明業相。以依不覺。心動爲業。覺則不動。動則有苦。果不離因。故二能見相。以依心動。能見境界。不動則無

見。三界界相。以依能見。妄境相現。離見則無境。

釋此爲二。一約無始無明釋。二約現前觀照釋。一約無始釋者。衆生無始已來法爾有八種識。卽法爾有諸心所與之相應。此心心所。並是真如不變隨緣所成。以真如從無始來盡未來際。決無不隨緣時。設不隨染淨緣造十法界。何以顯其不變之德。但無始來從未悟故。未有淨緣。祇隨染緣。名爲放逸。此放逸者。卽是八種大隨煩惱之一。於染淨品不能防修。縱蕩爲性。增惡損善。所依爲業。故云

依放逸故。而有不覺也。不覺卽六七兩識相應之俱生法癡。由其不能如實了知真法。一故遂使真故相無別之心。王心所幻成俗故。相有別之。各各四分以內二分體名爲業相。以外二分用名能見相。及境界相。心王心所不起。則已起。則法爾有此四分同時俱起。不可分析別異。故云不相捨離也。一無明業相者。果報心心所體。依無明不覺而動。動卽名業也。蓋第八識體純是異熟無記報法。第七雖名有覆無記。與前六識一分無記報法。及彼

相應報得心所皆名爲異熟生。此報法體皆名爲心。以依無明不覺而動。名之爲業。心卽證自證分。業卽自證分也。覺則契會真如。故不動不覺而動。則當體便是果報苦法。由動爲因。顯心苦果。故唯識論以第三自證分爲能量。第四證自證分爲量果。如鏡面鏡背兩不相離。故云果不離因也。二能見相卽心王心所現行起時。必有見分。能見於境。唯不動則無見耳。動卽有見。非先動而後見也。三界境界相卽心王心所現行起時。必有相分爲所緣。

境唯離見則無境耳。見卽有境。非先見而後境也。夫唯不覺故舉真如全體而爲心心所之各各三相。若能覺知三相無相。唯一真如。則一切心心所之業相卽真如體。一切能見卽真如相。一切境界卽真如用。故前文云。若有衆生能觀一切妄念無相。則爲證得如來智慧也。二約現前觀照釋者。若觀一切妄念無相。則一念相應。一念佛念。念相應。念念佛。卽名爲不放逸。卽名爲覺。所謂具縛凡夫。能知如來秘密之藏。雖是肉眼。卽名佛眼。並無三

相六相可以當情。苟一念放逸失於觀照，便有不覺便令三相及下六相紛然頓現也。除卻現前一念無明所現九相，豈別有無始無明所生九相哉？以有虛妄境界緣故，復生六種相。

境界唯是自心心所相分，故名妄。所謂依他起性，如幻事也。以此爲所緣緣及增上緣，復生六相。能生既是虛妄，則所生相豈有實哉？然前三相通於八識及諸心所，以心心所定各有四分故。此下六相則有局有通也。

一智相。謂緣境界生愛非愛心。即根本煩惱中之貪也。第六徧緣三界一切境界，徧起愛非愛心。愛卽是貪非愛，卽瞋。前五各緣現在一塵境界，各起愛非愛心。然此智相亦全攬真如爲體，與前覺義毫無差別。若能了達智無智相，卽爲證得如來智慧矣。

二相續相。謂依於智苦樂覺念相應不斷。

相續有二義。一約心所。卽受與念定。苦樂覺是受。由念故不忘。由定故專注也。二約心王。卽等無間意根。由智及念助彼心王相續而起。假立前念已滅。心王名爲意根。然第八第七從無始來法爾相續。不依於智。前六相續並依智起。故云相應不斷也。只此相續實無體性。譬如一星之火。旋之成輪。火念念滅。不從此方轉至餘方。由其相似相續妄觀爲輪。心性亦爾。念念寂滅。無相續義。迷情以爲似常。似一名相續相。若能諦觀相續無相。卽爲證

得如來智慧也

三執著相。謂依苦樂覺念相續而生執著。

執著卽別境中勝解心所。及貪瞋慢等任運諸煩惱也。大凡一刹那心。生已卽滅。無執著義。由其前後相似相續。乃有執著功能。此相唯是第六識有。以七八兩識及前五識。唯緣現在一刹那境。無執著故。然如實觀之。能執著者卽第六識見分。所執著者卽第六識相分。見分刹那不住。何能執著。相分亦復刹那不住。何可執著。若能了知執著無相。

卽爲證得如來智慧也

四執名等相。謂依執著分別名等諸安立相

此卽四不定中尋伺心所及根本中五見等煩惱也。亦唯在第六識。然能執者亦卽見分。刹那生滅。無能執義。所執者卽若名若義自性差別。名中無義。義中無名。名義自性了不可得。名義差別了不可得。隨心生滅。何可執著。若能了知執名等相卽是無相。卽爲證得如來智慧也。

五起業相。謂依執名等起於種種諸差別業

能起業者卽第六識相應之思。所起之業。通前五識。言差別者。或起惡業。或起善業。或禪定業。卽是三界諸有漏業。乃至出世無漏業。菩薩利他業。皆名起業相也。然此業性卽是身表語表。及與無表。且身表者。旣非形量。亦非動作。亦非動因。但是假名。非實有體。次語表者。一刹那聲。無詮表義。多念相續。似有詮表。便無實體。表業旣無實性。無表又豈有實。若能了知業相無相。卽爲證得如來智慧也。

六業繫苦相。謂依業受苦。不得自在。

既造三界有漏諸業。則爲三界業之所繫。引業所招異熟。總報滿業。所招增上別報。通名果報。五蘊樂是壞苦。苦是苦苦。不苦不樂是行苦。無常無我。所以皆不自在。乃至無漏及利他業。所感變易生死。亦名爲苦。亦不自在也。然此果報五蘊。色無自性。受想行識。亦無自性。既無自性。體卽真如。既卽真如。便具無邊德相。業用是則。只此業繫苦相。便是不可思議大乘。若能觀此苦相。無相卽爲證得。

如來智慧也。奈何無明不覺。復依此身心而幻成業。相等三相。及與六相。輪迴是中。自取流轉也哉。是故當知一切染法。悉無有相。皆因無明而生起。故此正結明三相六相。皆無實也。依於覺改。而有無明。無明已自無實相矣。况依無明所生染法。豈有實哉。言染相者。智等四相。是染惑。五起業。相是染業。此二並是染因。業繫苦相。并苦果。上所起三相。卽是界內界外。依正爲染果也。若因若果。皆因無明生起。譬如一翳在目。空華亂舞。醫病若除。華元

非有無明不起則苦卽法身惑卽般若業卽解脫  
何一非大乘耶。二依義各釋竟

○三總辨同異。二初標。二釋。○今初

復次覺與不覺有二種相。一同相。二異相

前明阿賴耶識有二種義。所謂覺與不覺。今故約  
此辨同異也。真如不變隨緣。旣舉體而爲阿賴耶  
識。卽舉體而爲覺。與不覺。覺與不覺。隨緣不變。旣  
舉體依於阿賴耶識。卽舉體便是真如。今約隨緣  
不變。生滅卽真如。故名爲同相。約不變隨緣。真如

卽生滅。故名爲異相。故上文云。二門展轉不相離

也

○二釋二。初釋同相。二釋異相。○今初

言同相者。如種種瓦器皆同土相。如是無漏無明種  
種幻用。皆同真相

無漏卽指覺義。無明卽不覺義。種種幻用。雙指依  
無漏智所起。不思議用。及依無明所起。三相六相  
也。皆同真相者。並是真如不變隨緣所成。是故隨  
緣不變。一。無非全體真如。如土作瓦器。無一器

而非全體是土也

是故佛說一切衆生無始已來常入涅槃。菩提非可修。相非可生。相畢竟無得。無有色相而可得見。見色相者。當知皆是隨染幻用。非是智色不空之相。以智相不可得故。廣如彼說。

此引經以證真如同相也。無始已來常入涅槃者。卽唯識論所謂自性清淨涅槃。一切有情平等共有也。菩提非可修。相非可生相者。卽大佛頂經所謂此見及緣。元是菩提妙淨明體。云何於中有是

非是也。無有色相而可得見者。卽前文所謂亦無不空相。以非妄念心所行故。唯離念者之所證故也。見色相者。以下釋疑難也。難曰。若約同相定。無色相可見者。如何現有。色相可見。亦見如來種種色相。釋曰。當知皆約生滅門中。隨染幻用。見有差別色相。非謂真如門中。智色不空之相。亦可見也。以智相同於真如。雖實不空。亦無不空相可得故。廣如彼契經中佛所說也。初釋同相竟。

⑤二釋異相

言異相者如種種瓦器各各不同此亦如是無漏無明種種幻用相差別故

不唯無漏覺相與有漏無明真相各別卽就無漏法中四智菩提三身四土乃至十力無畏十八不共法等種種幻用相各差別又就有漏法中心王心所相見自證現行種子及諸分段變易因果種種幻用相各差別然此幻用差別無性常異而同卽此無性真如無差別故徧攝一切差別之法皆入一法卽此一法所攝一切差別之法隨拈一法

亦復還攝一切諸法故得重重無盡無盡重重並由此同異二相而顯示也初正釋心生滅竟

⑤二明生滅因緣二初明迷染因緣二明悟淨因緣 ⑥初中二初總明依心故轉二別釋意及

意識 ⑦今初

復次生滅因緣者謂諸衆生依心意意識轉

生滅雖無自性全體真如而真如不變隨緣舉體成生滅時於生滅中須論因緣方免邪因及無因過此則第八與前七識互爲因果唯識理成也衆

生者五蘊和合之假名也。心者第八識也。意者第七識也。意識者第六識并前五識也。第八爲根本。依第七方轉。第七爲染淨依。第六方轉。第六爲分別依。前五方轉。故云依心意及意識轉也。

⑤二別釋意及意識二。初釋意。二釋意識。⑥今

初

此義云何。以依阿賴耶識有無明不覺起。能見能現。能取境界。分別相續。說名爲意。

謂阿賴耶識中。法爾有第七識種子。及有根本無

明種子。由無始來第七與第八識恒俱轉。故第七識與恒行不共無明定相應。故於一真如無相體上。令心心所分體分用。分見分相起。諸取著相似相續。皆以第七識爲染淨依。故說此第七識名爲意也。意者依義。依第七識方令第八受賴耶名。及異熟名。方令前六成有漏義。故名染依。若第七識之人我執斷。則第八識捨賴耶名。第六生空智果。恒得現前。前五不起。諸有漏業。若第七識之法我執斷。則第八識捨異熟名。轉爲大圓鏡智相應心。

品自亦平等性智恒共相應第六法空智果恒得現前前五轉爲成事智品故又名淨依也。如釋摩訶衍論引顯了契經云。種種心識雖有無量。唯末那轉無有餘法。所以者何。是末那識具足十一義無所不作故。此之謂也。

此意復有五種異名。一名業識。謂無明力不覺心動。由第七識恒與法癡相應。不如實知真法一故。令自與第八無始恒轉。令前六識依之得轉。心實無動。由不覺故。謂之爲動。動卽是現行轉。現行之體。

卽自證分名爲業相。是則一切心王心所業相皆依第七無明而起。名爲依他起性。故直名此第七爲業識也。若觀動心卽不生滅。卽得入真如門。

二名轉識。謂依動心能見境相。

由第七識恒行不共無明。不如實知真法一故。令諸心王心所法爾各有能見境相名爲見分。故直名此第七爲轉識也。若觀一切境界無是見者。則見無見相。卽得入真如門。

三名現識。謂現一切諸境界相。猶如明鏡現衆色像。

現識亦爾。如其五境對至卽現。無有前後。不由功力。由第七識不共無明。不如實知真法一故。令心心所起現行時。法爾各有所現境界。名爲相分。諸心。心所之體。猶如明鏡。見分如光。相分如所現像。若非第七執藏之力。則第八何由幻現三界三類性境。若非第七爲第六不共親依。則第六何由徧現一切假實諸法。若非第七爲前五染淨共依。則前五何由如其五境對至卽現。無有前後。不由功力。故直名此第七爲現識也。若觀一切境界無非見

者。則境無境相。卽得入真如門。

四名智識。謂分別染淨諸差別法。

由第七識不共無明。不如實知真法一故。令心心所現行轉時。幻成見相二分。復由第七人我法我二見力故。自旣妄執第八見分以爲實我實法。成染分別。復爲第六識之不共親依。爲前五識之染淨依。令前六識分別染淨諸差別法。故直名此第七爲智識也。若觀分別及所分別皆無自性。則智無智相。卽得入真如門。

五名相續識謂恒作意相應不斷任持過去善惡等業令不失壞成熟現未苦樂等報使無遠越已曾經事忽然憶念未曾經事妄生分別  
由第七識不共無明不如實知真法一故於真常中妄見生滅又不能知剎那不住當體寂滅於生滅中妄見相續是故念念內執第八為自我法令其受熏持種招異熟果念念為外六轉識依令其憶念過去分別未來若非第七俱生法執為前六依則第八識便不受前七熏持有漏種無能熏

之前七即無所熏之第八故第六識亦不憶念過去分別未來以無所依之七八即無能依之第六故故直名此第七為相續識也如釋論中引法門契經云第七識有殊勝力故或時造作持藏之用或時造作分別之依此之謂也若觀心性剎那不住當體寂滅則相續無相續相即得入真如門是故三界一切皆以八識心為自性離八識心則無六塵境界何以故一切諸法以第八心為主從第七妄念起凡八所分別皆分別八識自心所變心不見心無相可得

是故當知一切世間境界之相皆依衆生無明妄念  
而得建立如鏡中像無體可得唯從虛妄分別心轉  
心生則種種法生心滅則種種法滅故

此承上文止由第七不共無明不如實知真法一  
故內緣第八起二我執外爲六依令起妄念故有  
世間一切依正等法此一切法皆是八種識心所  
變卽以八識心爲自性若離能變之八種識心何  
有所變六塵境界可得是則一切諸法悉皆不離  
第八本識故云以心爲王皆從第七無明幻現故

云從妄念起也第八分別三類性境還是第八所  
變相分第七分別虛妄我法還是第七所變相分  
第六分別一切諸法還是第六所變相分前五分  
別五塵性境還是前五所變相分故云凡所分別  
皆分別自心也譬如有人大張其眼求覓已眼終  
不能見心亦如是故云心不見心也然眼不自見  
猶有他人能見其眼心不見心必無他人能見其  
心故云無相可得也問若無他人能見心者云何  
說有他心智通答由起妄念妄有緣影遂令他心

智者托此爲質變相而緣名了他心其實緣影卽是所變相分之影非是心體亦非見分。心體及心見分並無形相決不可見故如來云。我以佛眼猶不能見衆生之心。云何癡人說有心相可得也問第七緣第八之見分執爲實我實法是名以心緣心豈非心見心耶。答第七設能見第八者應名現量。何名非量。故知一切心心所之見分皆無形相可得決定不可見也。夫能變之心尚自無相可得則所變境界又豈有實是故當知一切世間境界

之相皆依衆生無明妄念而得建立謂依第七不共無明不如實知真法一故令心心所轉成四分則此世間一切境界不過皆是自心心所相分。心心所體如鏡相分如鏡中像不離鏡別無自體可得唯從虛妄分別心轉除卻諸心心所生滅之外何嘗有法自生滅耶。初釋意竟

⑤二釋意識

言意識者謂一切凡夫依相續識執我我所種種妄取六塵境界亦名分離識亦名分別事識以依見愛

等熏而增長故

前六種識總名了別境識。今舉第六。攝前五也。但言一切凡夫者且約迷染因緣言也。依相續識者以第七識爲染淨依。第七恒與第八俱轉無始不斷。故名相續識也。執我我所者。第七但有俱生我執。第六依之徧起分別俱生我及我所執也。種種妄取六塵境界者。第六或與前五俱起名爲同時意識。則取現在色聲香味觸之境界名爲五塵。或唯自起名爲獨頭意識。則取過現未來一切境界。

若於夢中。則取夢中所現境界。若入禪定。則取四禪四空所有境界。皆名爲法塵也。亦名分離識者。眼識但緣自所變色。乃至身識但緣自所變觸意識。雖能徧緣而不能知諸塵無性。唯是自心。故名分離識也。亦名分別事識者。六塵妄境名之爲事。不知無性之理。故名分別事識也。以依見愛等熏而增長故者。愛卽六識相應種種鈍使。見卽第六相應種種利使。現行熏成種子。種子復起現行。故增長也。初明迷染因緣竟。

◎二明悟淨因緣二。初總明悟有淺深。二詳釋淺

深差別 ⑤今初

無始無明熏所起識。非諸凡夫二乘智慧之所能知。解行地菩薩始學觀察法身菩薩能少分知。至究竟地猶未知盡。唯有如來能總明了。

無始無明。卽第七識俱生法癡。名爲根本住地。無明由此無明不如實知真法一故。所以衆生從無始來。真如不變隨緣。法爾有八種識。第七爲能執。第八爲所執。第八爲所熏。前七爲能熏。前七爲能

依。第八爲所依。凡夫世智固不能知。二乘真智亦所不達。以如來爲鈍根人。但說蘊處界法破其我執。未曾明言七八二種識。故解行地菩薩。卽信成就發心之後。便名爲解行地。唯識所謂資糧加行二種位也。乘大乘教修行信心滿十千劫。方得發心入解行地。方於藏識境界能學觀察。所謂尋思名。尋思義。尋思名義。自性尋思名義。差別皆是假有。實無唯識所現。故云大乘菩薩恒觀。意言爲境也。法身菩薩能少分知者。謂通達位真見道故。從

此分分斷障分分證真如也。至究竟地。猶未知盡者。謂十地滿足。猶有極微細所知愚也。唯有如來能總明了者。謂窮盡心識本源。通達心識性相。無餘惑也。此中談理唯實明位兼權者。為收一切機。故若論一乘實教。則初心便觀如來藏性。不變隨緣。能知八識之相。差別建立。又觀如來藏性。隨緣不變。能知八識之性。唯一真如。則有名字證得如來智慧。乃至究竟證得如來智慧。具如前文所明也。

起信論疏三

④二詳釋淺深差別。三初總明義深。二別示次第。三結示二障。⑤今初

此義云何。以其心性本來清淨。無明力故染心相現。雖有染心而常明潔。無有改變。復以本性無分別。故雖復徧生一切境界而無變易。

心性通指八識心王及諸心所之性。卽是真如不變性也。無明卽指第七識相應之微細法癡。不如實知真法一也。染心相現通指八識心王及諸心所皆有四分依他相起也。而常明潔無有改變者。

起信論疏三

三

心王心所各各四分既皆全攬真如爲體。真如隨緣不變故常明潔。如金作諸器諸器皆金也。復以本性無分別故等者。偏指心王心所所變相分亦以心性爲體全體。心性曾無變易。決無心外之境界也。

以不覺一法界故不相應無明分別起生諸染心。不相應無明者。正指第八識中無明種子不與第八識現行相應也。此明雖由無始已來無明力故。法爾有此八識及諸心所各各四分。乃至一切境

界。然此諸法原無改變原無變易。仍是一真法界。若能念念觀察動心卽不生滅。卽得入真如門。卽爲證得如來智慧。特以偶爾失照不覺一法界故。則第八識中無明種子卽與前七相應。而現行分別遂起復生諸染心也。如是之義甚深難測。唯佛能知。非餘所了。

謂第八識中無明種子。只須一念不覺。便起現行而生染心。此雖等覺菩薩。未轉異熟識爲無垢識。尚未能盡其源。唯佛位中。既與大圓鏡智相應。方

能通達其性相之邊底也。初總明義深竟。

⑤ 二別示次第。二初正釋悟淨次第。二轉釋相應不相應義。⑥ 初中二。初明離染心次第。二明

離不覺次第。⑦ 今初

此不覺所生染心有六種別。一執相應染。聲聞緣覺及信相應地諸菩薩能遠離。

執相應染謂我執相應之見思惑也。聲聞初果緣覺有學信成就發心菩薩皆能頓斷見惑漸斷思惑。故云能遠離也。

二不斷相應染。信地菩薩勤修力能少分離。至淨心地永盡無餘。

不斷相應染者。謂第六識相應之分別法執。二乘法中所不斷也。信地菩薩卽學唯心識觀。正伏此執。故至歡喜地中永盡無餘。

三分別智相應染。從具戒地乃至具慧地能少分離。至無相行地方得永盡。

分別智相應染者。謂第六識相應之俱生法執。雖是任運所起。以其不如實知真法。一故仍各分別。

智也。二離垢地名具戒。六現前地名具慧。分分漸  
斷名少分離。七遠行地名無相行。法空智果恒得  
現前。是故此染方得永盡。

四現色不相應染。此色自在地之所除滅。

此由無始已來。妄執依正不同。所有習氣熏在第八識中。雖不與現行轉識相應俱起。而此習氣種子力故。未能任運現相及土。名爲現色不相應染。若入第八色自在地。則此習氣永除。故能依中現正。正中現依也。

五見心不相應染。此心自在地之所除滅。

此由無始已來。妄執自心他心不同。所有習氣熏在第八識中。雖不與現行轉識相應俱起。而此習氣種子力故。未能自他互作。名爲見心不相應染。若入第九心自在地。則此習氣永除。故能自身入定。他身起。他身入定。自身起。一身入定。多身起。多身入定。一身起。乃至具足四辯。一音普答。一切衆生各別諸問難也。

六根本業不相應染。此從菩薩究竟地。入如來地之

所除滅

此由無始第七識之法見法愛法慢妄執第八以爲自內實法。所有習氣熏在第八識中。雖以第六法空智果恒現在前之力。不與第七現行相應俱起。而此習氣種子力故。未捨異熟識名。未證一切如來究竟平等不二法身。故須從菩薩究竟地。入於金剛喻定。除滅此種。乃入如來地也。初明離染心次第竟。  
二明離不覺次第

不覺一法界者。始從信地觀察地。行至淨心地。能少分離。入如來地方得永盡。

不覺一法界者。卽所謂無始無明住地根本惑也。恒與第七識相應。亦有特與第六識相應。皆所謂法癡也。由此無明方生一切染心。前已明所生染心。離有次第。故今更明離此不覺之次第也。二乘不聞此不覺名。何況知斷。故不復論。大乘始從信地。卽能觀察學斷。故亦名觀察地。雖復學斷。但能漸伏。猶未能離。良以有漏聞思修慧。未能破壞彼

種子故。行至初歡喜地。離第六識分別法癡。自後  
漸離俱生法癡。直至入如來地方得永盡。第七識  
中俱生法癡。以是恒行不共無明。極微細故。直至  
金剛喻定。現在前時。乃與根本業不相應。染一時  
俱滅也。當知漸教菩薩。但知次第離染。故須至淨  
心地。方能少分離此無明。若頓教菩薩。從初卽學  
觀察無明無性。不須別別除染。而能生之無明。旣  
得分分伏離。則所生之染法。亦自分分除滅。所以  
初發心。便名爲淨心地。不唯永斷第二不斷相應

染。乃至亦能除彼。第四第五二種不相應染。遂能  
示現入相成道。得色自在。得心自在也。問。前云  
依不覺故生三種相。及六種相。此云以不覺故生  
六種染。染之與相。爲同爲異。又生相時卽生染否。  
除染時卽除相否。答。所言相者。是所徧計之形相。  
體卽依他。通惑業苦。所言染者。是能徧計之種現。  
從依他起。唯指於惑。染如捏目。相如亂華。但應除  
染。不須除相。又一一相皆能起於六染。一一染皆  
能成於九相。故決不可指何染卽何相也。若約染

越什經卷三  
除相必隨除粗分別者。一執相應染卽界內見思。三乘離見惑時卽除界內執名等相。及起有漏業相。聖必不造後有業故。二乘思惑盡時卽除界內智及相續執取三相。二乘入涅槃時卽除界內業繫苦相及依苦蘊所起業等三相。菩薩有二。一者智增上捨分段生。生方便土。所除諸相與二乘同。二者悲增上。扶習潤生。不除界內智相及相續相。但除界內之執著相。仍用故業種子受生。故亦不除業繫苦相及與業等三相。但決不造新業故無。

起有漏業相也。二不斷相應染。卽界外見惑盡此惑已分證法身。唯除界外第四執名等相。三分別智相應染。卽界外現行思惑盡。此惑已證無相地。除界外執著及起無漏有功用業之相。然不除無功用業相也。四現色不相應染。卽相分戲論習氣。除此習已得色自在。能現諸色。非除境界相也。五見心不相應染。卽見分戲論習氣。除此習已得心自在。能現諸心。非除能見相也。六根本業不相應染。卽異熟無記果報習氣。除此習已。一切妄相無。

不除盡證諸如來平等法身無有彼此差別色相可得。故云一人成佛時法界皆爲一佛之依正。譬如一室千燈光各徧不可分別。而無障礙亦無雜也。又除染及不覺已方能顯出真如相用。謂諸如來法報合身恒自受用廣大法樂。卽是究竟業相。本後二智照一切法。卽究竟能見相。大圓鏡智相應淨識變爲無漏純淨佛土。周圍無際衆寶莊嚴。自受用身常依而在。如淨土量身量亦爾。諸根相好。一一無邊。卽究竟境界相。四智心品無差而

差。卽究竟智相。盡未來際不異不滅。卽究竟相續相。大慈大悲攝取衆生恒無厭倦。卽究竟執著相。於無名相法中施設種種希有名句文身令諸衆生得四悉益。卽究竟執名等相。恒現三輪不思議化。卽究竟起業相。同流九界遊戲地獄。卽究竟業繫苦相。又如來固能圓證究竟九相。發心已上亦卽分證九相。於修慧中亦有相似九相。於思慧中亦有觀行九相。於聞慧中亦有名字九相。一切衆生但有理卽九相也。九相平等無非法界卽真如

體大前之三相卽真如相大。後之六相卽真如用大。真如無分別故。無分別故。於此諸相之中。隨拈一相。無不還具體。相用三大義。可以意知。不可言盡。而皆不離衆生現前介爾之心。故依此心。顯示摩訶衍也。初正釋悟淨次第竟。

④二轉釋相應不相應義

相應義者。心分別異。染淨分別異。知相緣相同。心分別謂前七心王之體。染淨分別謂相應心所之體。心王心所皆以虛妄分別爲自性故。言各異

者。各起現行各有自體也。知相同者。能緣之見分。和合似一也。緣相同者。所緣之相分質影相似也。不相應義者。卽心不覺常無別異。知相緣相不同。卽心不覺常無別異。有心。謂第八心王見分。不覺

謂染心種子。卽是第八所緣相分。相見皆依自證分起。故云無別異也。知相不同者。第八現行見分。是能緣故有知。染心種子不起現行。是不能緣故無知也。緣相不同者。第八見分。以三類性境爲所緣。染心種子。則無所緣境也。二別示次第竟。

④三結示二障

染心者是煩惱障。能障真如根本智故。

此總結六種染心。皆各煩惱障也。我執相應種種諸惑。皆名界內見思煩惱。能障我空真如。法執相應種種諸惑。但除法癡一種。皆名界外見思煩惱。能障法空真如。唯根本智能證真如。既障真如。卽障根本智也。

無明者是所知障。能障世間業自在智故。

唯取法癡一種。名曰無明。由此法癡。於世間業不

得自在。名爲障彼智也。

此義云何。以依染心。執著無量。能取所取虛妄境界。違一切法平等之性。

此釋染心所以能障根本智也。一切法平等之性。卽是真如。本無能所。

一切法性平等寂滅。無有生相。無明不覺妄與覺違。是故於一切世間種種境界差別業用。皆悉不能如實而知。

此釋無明所以能障自在智也。唯如實知。方得自

在故。二明生滅因緣竟。

⑤ 三辨生滅之相。二初正分別。二問答釋疑。 (癸)

今初

復次分別心生滅相者有二種別。一粗謂相應心。二

細謂不相應心。

與心相應而起名相應心。卽心心所現行。楞伽所

謂相生住滅也。不與心相應起名不相應心。卽心

心所種子。楞伽所

相中之粗。凡夫智境。

粗中之粗卽第一執相應染也。本是二乘及信地菩薩之所遠離。今言凡夫智境者。信地名爲內凡。與二乘人同其智斷未入大乘聖位故。

粗中之細及細中之粗。菩薩智境。細中之細是佛智

境。藏中失此八字。准梁本補。

粗中之細卽不斷相應染。分別智相應染。細中之

粗卽現色不相應染。見心不相應染。菩薩謂淨心

地已上。細中之細卽根本業不相應染。唯有佛智

乃能照其源也。

此粗二種相皆由無明熏習力起。然依因依緣。因是不覺緣。是妄境。因滅則緣滅。緣滅故相應心滅。因滅故不相應心滅。非顯染心不滅。染心不滅。故不相應心滅。  
無明單指法癡。除此有屬染心攝故。不覺卽無明法癡也。緣滅則不起現行。故相應心滅。因滅則無復種子。故不相應心滅。成如來也。問。旣云因滅則緣滅。則未成佛時無明未滅。境必未滅。境旣未滅。則相應心亦不應滅。如何至無相地。使滅相應染已盡耶。答。無明有二。一與第七識俱者。佛地方盡。

本二與第六識俱者。又分爲二。一是分別淨心地除。二是俱生無相地除。無明分滅。則境亦分滅。境分滅故。相應心亦分滅也。又此所謂相應心滅者。但是染心現行滅耳。若無漏現行。則佛果四智皆有。二十一法相應不更滅也。所謂不相應心滅者。但是有漏種子滅耳。若無漏種。則恒爲菴摩羅識所持。盡未來際。永不滅也。初正分別竟。

癸二問答釋疑

問。若心滅者。云何相續。若相續者。云何言滅。

此正欲顯染心種現可滅淨心種現不滅故設問以發起之也

答實然今言滅者但心相滅非心體滅

心相卽指染相心體卽指染淨所依非染非淨之本體也染亦依體以違體故但名爲相淨亦有相所謂真如相大以順體故直名爲體也

如水因風而有動相以風滅故動相卽滅非水體滅若水滅者動相應斷以無所依之水無能依動之故以

水體不滅動相相續

水喻心體風喻無明動喻心相也

衆生亦爾以無明力令其心動無明滅故動相卽滅非心體滅若心滅者則衆生斷以無所依無能依故無明令其心動猶如因風起波則八識及諸心所皆動相也無明滅故染動相滅非心體滅如風息波滅水體不滅則四智相應心品皆如水也若心滅則衆生斷者如來名爲無上衆生若無所依之四智心體則無能依之假名如來故

以心體不滅心動相續



